



EDISI
BM

JULAI/OGOS 2014

PERCUMA
KDN PP11723/1212012 (032229)

KEMAS KINI HARIAN UNTUK ANDA: BERITA, RENCANA, WAWANCARA, ANALISIS POLITIK SEMASA

DITUBUHKAN PADA 1966
DI KUALA LUMPUR

Rocket

www.roketkini.com

03-7803 3333
blooming.com.my
QUALITY FLOWERS. WORLDWIDE DELIVERY Fax: 03-7803 0000

ISSN 1823-8416



9 771823 841002

www.dapmalaysia.org

facebook.com/roketkini

twitter.com/roketkini

roketkini@gmail.com



Dapur Jalanan sedia
hadapi saman > 3



DAP kecam larangan puasa
kerajaan China > 12



EKSKLUSIF: Merdeka dari
mata orang muda > 8,9



Menteri BN halang sedekah PUTUS SUDAH KASIH SAYANG?

Ketika umat Islam sedang menghayatibulan Ramadhan penuh keberkatan, Menteri Wilayah Persekutuan Datuk Seri Tengku Adnan Tengku Mansor mengumumkan kerajaan akan mengenakan hukuman terhadap pemberi dan penerima sedekah yang sebahagian

besarnya adalah gelandangan.

Pengumuman Tengku Adnan pada 1 Julai lalu itu dikecam banyak pihak sebagai tidak berperikemanusiaan dan membelakangi hak politik golongan kurang bernasib baik di ibu kota.

Pihak berkuasa menjelaskan

langkah yang bakal diambil bertujuan membantu gelandangan secara lebih tersusun. Namun, kritikan timbul kerana, seperti biasa, kerajaan gagal melibatkan kelompok aktivis sosial yang telah lama beroperasi di lapangan untuk membantu golongan terbabit.

Kegagalan melibatkan organisasi bukan-kerajaan bukan saja menyebabkan penyelesaian menyeluruh mungkin tidak berhasil, malah ia akan lebih memburukkan keadaan kerana tindakan yang dirancang bakal mencabul hak dan kebebasan gelandangan.

MENGIMBAS TRAGEDI 13 MEI

Biarpun tragedi 13 Mei 1969 telah 45 tahun berlalu, namun sehingga kini pimpinan Umno-BN masih tetap mengapi-api perkara itu untuk menakutkan rakyat agar mereka dapat mengekalkan kuasa.

Apa yang menghairankan, selepas pelbagai ugutan dibuat, tiada sebarang tindakan dilakukan oleh pihak polis untuk mengenakan hukuman ke atas mereka yang cuba menggugat keharmonian negara ini.

Pimpinan tertinggi Umno-BN juga seolah-olah hanya menutup mata dan terus membiarkannya berlaku. Malah, terbaru, Timbalan Perdana Menteri sendiri mengungkit tentang 13 Mei. Rakyat tertanya-tanya apakah ini adalah perancangan atau dasar pemerintah untuk memecahbelah kestabilan masyarakat.

Kita juga tertanya-tanya untuk apa MCA dan Gerakan dikembalikan ke dalam Kabinet apabila 'hantu' 13 Mei terus menjadi senjata untuk mengugut rakyat. Inikah transformasi, perpaduan nasional dan konsep wasatiyyah Umno-BN?

Muhyiddin layak jadi idola golongan rasis dan pelampau

GEORGE TOWN, 6 JULAI: Perilaku Timbalan Perdana Menteri Tan Sri Muhyiddin Yassin yang berterusan menyebar kebencian kaum serta memberi amaran tidak mustahil 13 Mei 1969 akan berulang menunjukkan bahawa beliau hanya layak menjadi contoh teladan kepada golongan pembenci kaum dan pelampau seperti Perkasa dan Isma, kata Setiausaha Agung DAP Lim Guan Eng.

"Muhyiddin bukan saja tidak bertanggungjawab tetapi menunjukkan bahawa beliau hanya layak menjadi contoh teladan kepada NGO sayap kanan seperti Perkasa dan Isma sebagai seorang pentaksub serta pelampau dan sama sekali tidak layak menjadi Timbalan Perdana Menteri untuk semua rakyat Malaysia.

"Beliau nampaknya semakin membina reputasi sebagai 'poster boy' Perkasa dan Isma selepas memalukan prinsip 1Malaysia Perdana Menteri Datuk Seri Najib Razak apabila menyatakan dirinya adalah 'Melayu dulu, Malaysia kemudian'.

"Dengan mengamalkan sikap bermusuhan, dapatlah kita simpulkan bahawa Muhyiddin bukan saja tidak hormat, malah tidak bertolak-ansur terhadap bukan-Muslim dan bukan-Melayu," katanya dalam satu kenyataan.



"Muhyiddin bukan saja tidak bertanggungjawab tetapi menunjukkan bahawa beliau hanya layak menjadi contoh teladan kepada NGO sayap kanan seperti Perkasa dan Isma sebagai seorang pentaksub serta pelampau."

Sehubungan itu, Guan Eng menyarankan parti komponen BN supaya memberi kata dua kepada Muhyiddin yang tidak henti mengeluarkan kata-kata bersifat kebencian dan perkauman.

"8 orang Menteri Kabinet iaitu 2 MCA, 2 MIC, satu Gerakan, satu Parti Bersatu Sabah (PBS), satu Parti Rakyat Sarawak (PRS) dan satu dari Parti Rakyat Bersatu Sarawak

(SUPP) perlu mendesak Muhyiddin menarik semula kenyataannya atau mereka ini meletakkan jawatan sebagai tanda protes.

"Kegagalan berbuat demikian hanya akan menunjukkan bahawa 6 parti komponen BN dan menteri mereka menerima serta membenarkan kenyataan melampau Muhyiddin terhadap bukan-Muslim," tegas Ahli Parlimen Bagan itu.

Pensyarah UIA kecam kenyataan Muhyiddin

KUALA LUMPUR, 8 JULAI: Pensyarah Kanan Universiti Islam Antarabangsa (UIA) Dr Maszlee Malik menyelar tindakan kerajaan yang tidak henti memberikan amaran dan ugutan bersifat perkauman terhadap rakyat.

Mengulas mengenai amaran Timbalan Perdana Menteri Tan Sri Muhyiddin Yassin bahawa peristiwa rusuhan kaum 13 Mei 1969 akan timbul semula, beliau berkata, "Pemimpin yang menjadi rujukan kepada rakyat sepatutnya memberikan harapan masa depan yang cerah. Kita perlu titipkan kepada jiwa rakyat untuk lihat satu sudut yang lebih positif.

"Kalau kerap memomokkan mereka dengan memainkan elemen negatif, maka mereka akan takut pada perkara yang tak pasti.

"Rakyat perlu diberikan harapan dan bukan ugutan atau ketakutan. Cukup-cukuplah kita memomokkan rakyat. Kalau hantu tak wujud pun, kita akan kata hantu itu wujud," katanya, seperti yang dilaporkan Malaysiakini.

Utusan Malaysia pada hari Sabtu, 5 Julai, menyebut, Muhyiddin memberi amaran peristiwa 13 Mei mungkin timbul sekali lagi jika perlombagaan terus dipersoal.

Kenyataan Muhyiddin mendapat kecaman pelbagai pihak, termasuk Ketua Parlimen DAP Lim Kit Siang yang

menyifatkan ugutan itu membuktikan kegagalan BN dalam merangka dasar perpaduan negara.


• FAKTA •
LAGI-LAGI 13 MEI

- **5 Julai 2014:** Timbalan Perdana Menteri Tan Sri Muhyiddin Yassin berkata dalam Utusan Malaysia bahawa insiden 13 Mei akan berulang jika hubungan antara kaum tidak dipelihara, kononnya kerana kebelakangan ini masyarakat Melayu dan Islam sering dihina.
- **6 Februari 2014:** Sepanduk "Bangsa Cina cawpinis keturunan kangkung, neneh dan nyonya kepala perkauman, rasuah, nepotisme dan kronisme, 13 Mei 1969 dalam igauan", dibawa oleh sekumpulan 50 orang individu yang bertindak menyembelih dua ekor ayam dan melumur darahnya pada kain rentang pemimpin DAP.
- **18 Januari 2014:** Sepanduk "Kerana mulut pemimpin DAP, 13 Mei 1969 berlaku..mahu lagi kaa!" dalam demonstrasi di Seberang Jaya untuk membantah flash mob 'kangkung'. Demonstrasi turut dihadiri Ahli Parlimen Kepala Batas Dato' Reezal Merican dan Setiausaha UMNO Pulau Pinang Dato' Musa Sheikh Fadzir.
- **3 Jun 2013:** Menteri Komunikasi dan Multimedia Datuk Seri Ahmad Shabery Cheek meluluskan filem kontroversi Tanda Putera untuk tayangan sempena Hari Kemerdekaan. Filem ini memaparkan babak pemimpin Cina kencing di tiang bendera yang sebenarnya tidak pernah terjadi. Kejadian itu kononnya mencetuskan rusuhan 13 Mei.

Akta Orang Papa seperti ISA, gelandangan boleh ditahan sehingga 6 tahun!

GELANDANGAN di Kuala Lumpur ber-depan ancaman serius terhadap ke-bebasan mereka apabila Kementerian Pembangunan Wanita, Keluarga & Masyarakat (KPWKM) bercadang meminda Akta Orang-Orang Papa 1977 bagi memasukkan elemen penguatkuasaan ke dalam akta tersebut.

Menurut Ahli Parlimen Serdang Ong Kian Ming, pindaan tersebut membenarkan kerajaan menahan gelandangan secara paksa untuk tempoh berpanjan-gan sehingga enam tahun.

Menteri KPWKM, Datuk Seri Rohani Abdul Karim sebelum ini berkata, operasi menyeluruh akan dijalankan bagi memastikan tiada lagi rakyat Malaysia yang mengemis dan berkeliaran tanpa

mendapat perlindungan yang sesuai.

Gelandangan konnaunya akan diberi penjagaan dan pemuliharaan selama tiga tahun dan boleh dibebaskan lebih awal menurut dua syarat, seperti mana yang terkandung di dalam Seksyen 8 (1) Akta Orang-Orang Papa 1977.

Justeru kata Kian Ming, sekiranya gelandangan ditahan di bawah Ops Qaseh yang dirancang kerajaan pada Julai 2014, mereka tidak akan dibebaskan sehingga mendapat pekerjaan sesuai atau terdapat sukarelawan yang menjaga mereka, termasuk menyediakan perumahan.

"Memerintahkan mereka untuk mencari pekerjaan yang tetap atau mempunyai rumah kediaman sebelum dibebaskan dari rumah kebaikan adalah satu

bentuk kezaliman.

"Ramai gelandangan yang berada di Kuala Lumpur tidak mempunyai pekerjaan tetap kerana terputus hubungan dengan ahli keluarga mereka.

"Akta Orang-Orang Papa tidak harus digunakan seperti Akta Keselamatan Dalam Negeri (ISA) untuk menahan gelandangan," tegasnya.

Tambah Kian Ming, meletakkan gelandangan di rumah kebaikan yang bertentangan dengan kehendak mereka adalah satu bentuk pelanggaran hak politik.

"Menggunakan Akta Orang-Orang Papa untuk menahan gelandangan dan menjadikan mereka seperti penjenayah mesti dikutuk," ujarnya.

Seksyen 8 (1) Akta Orang-Orang Papa 1977

- Jika berpuas hati penghuni mendapat pekerjaan sesuai untuk menyenggara dirinya, atau kepada jagaan seseorang yang mahu dan berkebolehan menjaga dan menanggung penghuni dengan sepenuhnya.

Seksyen 3 Akta Orang-Orang Papa 1977

- Majistret boleh mengarah gelandangan tinggal di rumah kebaikan sehingga satu bulan.

Seksyen 4 Akta Orang-Orang Papa 1977

- Berdasarkan syor pegawai kebaikan masyarakat, majistret boleh memerintah gelandangan kekal di rumah kebaikan sehingga tempoh tiga tahun. Perintah ini boleh dilanjutkan selama tiga tahun lagi.

Dapur Jalanan sedia hadapi saman



KUALA LUMPUR: Kolektif Dapur Jalanan Kuala Lumpur (DJKL) bersedia berhadapan kemungkinan pelbagai operasi pembersihan gelandangan di Kuala Lumpur mem-babitkan Dewan Bandaraya Kuala Lumpur (DBKL), Agensi Anti Dadah Kebangsaan, Jabatan Imigresen Malaysia serta polis.

DJKL bertegas meneruskan aktiviti berkongsi makanan bersama gelandangan dan warga miskin kota walapun berhadapan risiko disaman penguatkuasaan kerana yakin golongan itu wajar mendapat pem-belaan.

Jurucakap DJKL Wong Kar Fai berkata, kerajaan dijangka meminda Akta Orang

Papa 1977 dalam persidangan parlimen sesi Jun-Julai baru-baru ini bagi membolehkan tindakan penguatkuasaan lebih keras diam-bil terhadap golongan miskin tegar bandar yang tidak berumah.

Walaupun pindaan tidak berlaku, namun DJKL terus bersedia menghadapi pelbagai operasi pembersihan dan tangkapan ke atas golongan tidak berumah sekiranya pindaan Akta tersebut dilaksanakan.

"Kami tak tahu bila dan apa pindaan yang akan dibuat. Tetapi yang pastinya kerajaan dah buat persediaan awal dengan men-gadakan pelbagai operasi," katanya dalam satu kenyataan.



Aneh, ada Muslim larang amal kebaikan di bulan Ramadhan

RAMADHAN adalah bulan yang paling ditunggu-tunggu umat Islam untuk melakuk-an kebaikan dan amal soleh. Namun anehnya ada orang Islam bertaraf Menteri melarang amal kebaikan dilakukan di bulan Ramadhan.

Kenyataan Menteri Wilayah & Kesejahteraan Bandar, Datuk Seri Tengku Adnan Tengku Mansor baha-wa sesiapa yang didapat memberi sedekah dalam lingkungan dua kilometer daripada kawasan Bukit Bintang akan disaman.

Ahli Parlimen Segambut Lim Lip Eng berkata, niat Tengku Adnan untuk 'mem-bersihkan' golongan fakir miskin dan gelandangan di ibu kota menunjukkan beliau se-memangnya memandang jijik golongan itu.

"Saya belum pernah melihat seorang Muslim yang begitu keras hatinya sehing-ga sanggup mengeluarkan arahan sebegini dangkal di bulan mulia ini, ketika umat Islam berlumba-lumba membuat kebaikan," kata Lip Eng.

Adnan turut menghalang mana-mana badan sukarelawan untuk meneruskan ke-giatan agihan makanan percuma, kononnya untuk menjaga imej Kuala Lumpur dan Malaysia di mata pelancong asing.

Sedangkan aktiviti berkongsi makanan kepada gelandangan tidak ditaja syarikat swasta ataupun jabatan kerajaan, sebaliknya melalui inisiatif peribadi mereka yang mahu membantu golongan tidak berna-sib baik.

Semoga Ku Nan mendapat hidayah

Sehubungan itu, Lip Eng menasihatkan Adnan agar segera bertaubat, apatah lagi di bulan Ramadhan, ketika amalan seperti be-sedekah sangat dianjurkan agama.

"Di bulan yang mulia ini, saya rasa begitu pelik melihat seorang menteri Umno beragama Islam tiba-tiba mengisyihar perang terhadap amal kebaikan, bersedekah dan memberi makan fakir miskin."

"Rakan-rakan Melayu dalam DAP mengajar saya bahawa apabila matinya seseorang Muslim, terputuslah daripadanya semua perkara kecuali tiga. Anak yang baik yang mendoakannya, ilmu yang bermanfaat dan sedekah."

"Maka saya menggesa beliau menarik ba-lik arahan yang tidak berperikemanusiaan itu. Semoga Ku Nan mendapat hidayah," kata Lip Eng.

NOTA EDITOR

Politik baru melawan taksub

Nampaknya puasa tidak melunturkan nafsu terhadap kuasa dan syahwat untuk mempertahankan kekuasaan dengan apa jua cara.

Pada Sabtu, 5 Julai yang lalu, Tan Sri Muhyiddin Yassin membuat kenyataan yang jelas menghasut, dengan menyebut 13 Mei mungkin berulang kerana Melayu keronnya sering dihina. Padahal beliau adalah Timbalan Perdana Menteri Malaysia, negara yang rakyatnya berbilang kaum.

Sejak selepas PRU13, sentimen taksub perkauman dan keagamaan semakin kerap dimainkan oleh Umno. Tindakan itu tidak lain adalah ikhtiar untuk parti itu memulihkan sokongan terhadapnya yang jelas semakin merosot.

Tidak berapa lama sebelum kenyataan Muhyiddin itu, soal negara sekular dan negara Islam sekali lagi dibangkitkan, dibincangkan tanpa mengemukakan sebarang inti yang bermakna. Maka tidak keterlaluan kalau dinyatakan bahawa tindakan membangkitkan perkara itu tidak lain hanyalah untuk menggas taksub keagamaan dan memecah-belahan rakyat Malaysia demi satu tujuan: pecah dan perintah.

Politik baru ini – politik buta warna kulit, politik pembelaan terhadap golongan tertindas dan lemah, politik persaudaraan kemanusiaan dan kewarganegaraan – mesti disebar dan dimantapkan.

Perkembangan terakhir yang melibatkan Muhyiddin itu membuatkan kita yakin bahawa politik taksub perkauman dan keagamaan telah mendarah-daging dalam Umno. Lebih malang lagi, tiada seorang pun pemimpin parti komponen BN yang lain berani bersuara.

Justeru itu, "politik baru" yang dijunjung dan diwar-warkan oleh ahli-ahli politik Pakatan Rakyat, khususnya oleh ahli-ahli politik muda sejak Pilihanraya Kecil Teluk Intan pada Mei lalu, menjadi sesuatu yang teramat penting.

Politik baru ini – politik buta warna kulit, politik pembelaan terhadap golongan tertindas dan lemah, politik persaudaraan kemanusiaan dan kewarganegaraan – mesti disebar dan dimantapkan.

Mengambil semangat pengorbanan dan penyerahan diri kepada Tuhan pada puasa Ramadan, semangat fitrah dan kemurnian pada Aidil Fitri, serta semangat Merdeka yang bakal disambut di hujung Ogos nanti, wajalah diperbaharui tekad untuk berkurban demi masyarakat yang benar-benar majmuk yang diimpikan, kembali kepada persaudaraan yang merupakan fitrah bangsa Malaysia di zaman awal kemerdekaan, untuk membebaskan diri daripada belenggu taksub perkauman dan keagamaan.



Negara sekular dan iltizam agama

Oleh EDRY FAIZAL

Jika ada perkataan bermula dengan huruf 'S' yang sarat dengan nilai negatif buat masyarakat Muslim selain daripada 'syaitan', perkataan itu tentulah 'sekular'. Segala rasa negatif itu tidak muncul dari ruang vakum, sebaliknya sering kali dihadang bersama dengan kisah-kisah Mustafa Kamal Ataturk mensekularkan Turki dengan begitu melampau sejurus selepas kejatuhan sistem Khalifah.

Dengan berkembangnya "Islam politik", negara bersifat sekular dijadikan anti-tesis atau lawan – sebagai simbol yang harus ditentang dalam usaha mendapatkan kuasa bagi membentuk sesuatu yang disebut sebagai "Negara Islam". Maka negara bersifat sekular sering kali dijadikan alasan sebagai ibu segala kejahatan yang perlu ditewaskan.

Tidak kira negara Islam, sekular, atau drakula, persoalannya apakah itu 'negara'? Negara adalah entiti yang memonopoli secara absahnya kemampuan untuk memaksa, dalam lingkungan kawasan yang dikuaranya. Kuasa itu perlu bagi memastikan masyarakat manusia dapat hidup aman.

Tanpa sebuah negara yang kuat, masyarakat akan hidup saling berperang kerana tersemat dalam diri manusia sifat untuk saling menguasai. Keteraturan perlu dipaksakan ke atas manusia oleh satu kuasa yang lebih besar. Itulah peranan utama negara, iaitu dalam soal keselamatan, perlindungan serta menggalakkan nilai-nilai kesetaraan. Dalam erti kata lain, negara merupakan 'pihak ketiga' untuk memastikan kerukunan warganya.

Sekiranya berlaku pertelingkahan dan muncul pihak ketiga untuk mendamaikan mereka yang bertelagah, bukankah lebih

Bagi sebuah negara sekular yang ideal, agama itu sendiri tidak sepatutnya disembunyikan daripada wacana awam, termasuklah wacana politik.

Tidak kira apa pun kepercayaan, sebagai warga yang setara, kepercayaan berhak dizahirkan dan dihormati.

baik pihak ketiga itu bersifat 'neutral'? Atau sekiranya suatu pihak diberikan kuasa, lebih-lebih lagi kuasa menghukum atau mengagih sumber, bukankah lebih molek jika pihak itu bersifat 'neutral'?

Sifat tidak berpihak negara merupakan prinsip teras sekular. Tidak berpihak bermakna tidak menyokong atau menentang mana-mana agama atau pegangan hidup. Contoh terbaik mungkin Amerika Syarikat – negara Barat yang dari segi budayanya kuat beragama, malah sebahagian besar kawasan tenggara dan selatan-tengahnya diberi julukan Bible Belt. Namun perlembagaan Amerika bersifat sekular, tidak mendukung, tetapi tidak pula menentang dan mendiskriminasi mana-mana kepercayaan.

Prinsip tidak berpihak memberikan peluang setiap warga mengamalkan kepercayaan masing-masing dengan bebas, tanpa diskriminasi sama ada secara terang mahupun halus daripada negara – sesuatu yang tentu sekali dihargai masyarakat Islam, terutamanya saat mereka merupakan kelompok minoriti.

Bagi sebuah negara sekular yang ideal, agama itu sendiri tidak sepatutnya dis-

embunyikan daripada wacana awam, termasuklah wacana politik. Tidak kira apa pun kepercayaan, sebagai warga yang setara, kepercayaan berhak dizahirkan dan dihormati. Hanya saja apabila memasuki ruang yang dikongsi bersama, proses untuk mencari kesepakatan itu tentulah perlu menggunakan 'laras bahasa' serasional mungkin, dengan harapan pihak yang lain dapat melihat sisi-sisi baik pandangan itu, bukannya memaksa pandangan alam yang kita percaya terhadap yang lain.

Iman seseorang insan beragama tidak akan luluh hanya kerana negara yang didiaminya bersifat sekular. Sebaliknya tanpa ada sebarang pemaksaan daripada negara dalam urusan agama, warga dapat berlitizam dengan agamanya, beragama dengan sebenar-benar ikhlas, bukan kerana mendapat manfaat atau takutkan hukuman negara.

Negara yang baik bukanlah negara yang memaksa seseorang warga mengamalkan agamanya. Negara yang baik membolehkan seseorang warga mengamalkan agamanya serta mencegah segala bentuk pemaksaan yang mengganggu iltizam mereka terhadap agama mereka.

EDITORIAL

EDITOR AL MUSTAQEEM MAHMOD RADHI
SUB-EDITOR SIDIQIN OMAR
WARTAWAN IZMIL AMRI • AEDI ASRI • ALIFF FIKRI
JURUGAMBAR AHMAD YUSOF
PENYELARAS ROKETKINI EDRY YUSOF
GRAFIK & REKAETAK WAHYUDI MOHD YUNUS

 [facebook/roketkini](#)  [roketkini@gmail.com](#)  [twitter@roketkini](#)

The Rocket Edisi Bahasa Malaysia mengucapkan ribuan terima kasih kepada semua pihak, termasuk Unit Penerangan Pejabat Ketua Menteri Pulau Pinang, yang telah memberi sumbangan bahan bertulis dan bergambar.

Antara sekular dan agama, antara inklusif dan eksklusif

Oleh HOWARD LEE

Masyarakat kita berbilang kaum, itu adalah satu hakikat. Hampir semua kaum di negara kita ini kuat beragama, itu juga tidak dapat dinafikan. Perkara-perkara yang tidak mampu menerima kedua-dua hakikat ini tertolak dengan sendirinya.

Tidak beretik dan berlawanan dengan semangat keadilan jika kita membaca jalan pembinaan negara ini dengan cara yang tidak menghiraukan kelompok tertentu. Dengan menggunakan kefahaman ini sebagai latar, banyak orang berpandangan bahawa kembara pembinaan negara kita telah mencapai persimpangan tertentu. Namun, saya ingin mencabar pandangan itu dan menyatakan kita telah melepas persimpangan dan sekarang berada di jalan lorong berbeza. Jarak di antara kedua-dua jalan itu pula sedang menjauh.

Jalan “eksklusivisme”

Banyak orang memilih jalan keagamaan dan perkauman yang eksklusif, menuju kepada keseragaman. Kebanyakan orang yang mengambil jalan ini merasa dirinya (atau kaum dan kelompoknya) adalah yang paling hebat, manakala pihak lain yang tidak ‘seketurunan’ atau tidak berkongsi kepercayaan diabaikan begitu saja.

Antara pihak yang memilih jalan eksklusif ini ialah golongan yang memperjuangkan “Negara Islam”. Jalan ini juga digelar sebagai lawan kepada sekularisme. Tidak semua Muslim di Malaysia memilih jalan Islamisme ini dan banyak juga di kalangan mereka yang kuat menentangnya.

Antara tindakan yang dibuat oleh pendukung jalan “Negara Islam” ini ialah memperjuangkan ketuanan kaum tertentu, menggugut untuk mencabut kerakyatan para penentang mereka, merampas jenazah, melarikan anak dan sebagainya. Mereka seolah-olah tidak peduli tindakan mereka itu bertentangan dengan prinsip kesetaraan, kasih-sayang dan persaudaraan kemanusiaan yang dianjurkan oleh Islam.

Salah satu sebab pendekatan kasar sebegini dipakai ialah kerana ia menyentuh nafri manusia untuk mempertahankan diri. Bagi parti seperti Umno-BN, pendekatan sebegini jika terus-menerus dipakai akan memungkinkannya untuk terus berkuasa.

Inilah yang sedang kita lihat sekarang. Pendekatan pembinaan negara yang eksklusif, yang meminggirkan semua kelompok selain kelompok sendiri, yang ditaja oleh kerajaan kini dan digerakkan oleh proksi seperti Perkasa dan Isma, akan semakin menghakis rasa saling menghormati antara anggota kelompok kaum dan agama, membawa masing-masing ke jalan yang berbeza-beza dan semakin jauh jarak antaranya.

Jalan “inklusivisme”

Konsep negara sekular sering disalahfahami atau disalahtafsir sebagai anti-Islam atau anti-agama. Perancis antara negara yang bertanggungjawab menyebarkan sa-



Malaysia tidak memerlukan pentadbiran keagamaan yang dogmatik, dan ia juga tidak memerlukan pentadbiran sekular yang dogmatik. Malaysia memerlukan jatidiri yang membolehkan warganya untuk mengamalkan agama tanpa takut ditindas atau dipinggirkan.

dalam masyarakat majmuk Malaysia, perlu ada sikap saling menghormati dan saling menerima antara warga. Tidak wajar untuk kita keterlaluan mempertahankan pandangan sendiri. Kita perlu belajar menghormati pilihan orang lain dan menerima pandangan pihak lain sebagai setara.

Malaysia tidak memerlukan pentadbiran keagamaan yang dogmatik, dan ia juga tidak memerlukan pentadbiran sekular yang dogmatik. Malaysia memerlukan jatidiri yang membolehkan warganya untuk mengamalkan agama tanpa takut ditindas atau dipinggirkan.

Islamisme dan sekularisme bukan hanya sejenis

Islamisme atau sekularisme tidak tunggal. Kedua-dua faham ini dibahaskan secara sengit di seluruh dunia. Perbincangan tentang negara sekular dan negara Islam di Malaysia kini ternyata lebih merosakkan dan tidak membina. Kedua-dua pihak yang terlibat dalam perdebatan membentangkan gambaran dogmatik bagi agenda mereka, dan perdebatan itu sendiri dijalankan secara dogmatik.

Kita seolah-olah sedang telah sampai ke jalan mati. Saya percaya semua kita perlu menilai semula pendirian kita. Saya percaya debat negara Islam lawan negara sekular tidak akan berakhir dengan kata pemutus dalam masa terdekat. Sampai masanya untuk kita bertanya kepada rakyat Malaysia sama ada kita mahu mengambil jalan pertembungan dan ketegangan atau memilih jalan harmoni dan saling menghormati; sama ada kita mahu memilih jalan eksklusivisme atau jalan inklusivisme.

Kita tidak harus membiarkan diri terbebani selamanya dengan perbahasan yang telah lama berlarutan, dengan segala sejarah hitamnya. Saya percaya, rakyat Malaysia perlu mengambil jalan inklusivisme. Anda akan dapat DAP berada di jalan ini.

Perkara yang negara kita perlukan

Berdasarkan takrif, sekularisme pada asasnya adalah pemisahan antara Agama dan Negara. Dalam konteks Malaysia, sekularisme berperanan sebagai asas urus tadbir bagi memastikan kepentingan majoriti tercapai, manakala kepentingan minoriti pula terpelihara.

Untuk memelihara keadaan harmoni antara anggota pelbagai kaum dan agama

*Penulis adalah Adun DAP Pasir Pinji, Perak.

Ramadan yang manusiawi

Oleh DR MASZLEE
MALIK



Alaman 'berpuasa' dalam erti akata menahan diri daripada makan dan minum bukanlah amalan yang ekslusif dan unik bagi pengikut agama Islam semata-mata. Kebanyakan agama dan kepercayaan mempunyai ritual 'berpuasa' masing-masing yang berbeza-beza (lihat: <http://www.beliefnet.com/Faiths/2001/02/Fasting-Chart.aspx>), namun terdapat beberapa persamaan dari segi falsafahnya – iaitu untuk menahan nafsu, mendisiplinkan diri dan juga untuk mencari ketenangan dalaman.

Bagi agama Islam, hakikat bulan Ramadhan adalah untuk membangkitkan sikap 'taqwa' (surah al-Baqarah: 183). Sikap taqwa seringkali hanya difahami sebagai kualiti ketundukan dan kepatuhan individu dalam hubungan vertikalnya dengan Yang Maha Pencipta. Ia sering dikaitkan dengan kepatuhan mengerjakan ibadat dan usaha menjauhkan diri daripada dosa.

Hakikatnya, taqwa mempunyai makna yang lebih komprehensif dan lebih luas daripada sekadar unsur spiritual semata-mata. al-Quran mengaitkan sikap 'taqwa' itu dengan kualiti 'al-Bir', iaitu kebijakan (al-Baqarah: 177 dan 189).

Ramadan juga tidak boleh hanya disikapi sebagai bulan menahan lapar dan dahaga semata-mata untuk menyambut hari raya 'Eidul Fitri'. Ia juga bukanlah

hanya sekadar bulan untuk menjadikan diri individu Musim untuk bertaubat dan menjadi Muslim yang lebih baik hubungannya dengan Tuhan, semata-mata untuk masuk ke dalam syurga sahaja.

Sikap seperti ini akan menenggelamkan ruh atau objektif sebenar Ramadhan. Ramadhan seperti ini tidak akan dapat membawa apa-apa transformasi di dalam masyarakat mahupun negara. Ia hanya akan menjadi Ramadhan budaya, Ramadhan ritual dan Ramadhan individualistik.

Tidak dinafikan Ramadhan adalah bulan latihan disiplin untuk individu Muslim. Dalam menjalankan puasa, Muslim melaksanakan 'pilihan kebebasannya' dan kemampuannya untuk mengawal 'nafsu tabi'i', iaitu untuk makan, minum dan melakukan hubungan seks.

Menahan nafsu secara sukarela ini merupakan kemuncak kemanusiaan, kerana hanya manusia sahaja yang mampu mengawal nafsu mereka walaupun mereka mempunyai pilihan untuk makan dan minum apabila makanan sudah berada di hadapan mata.

Di samping sepanjang hari

menahan diri daripada melakukan perkara-perkara yang membatal dan mencacatkan puasa, Muslim yang berpuasa dididik untuk menjaga hati, mulut dan perasaan daripada perkara-perkara yang tidak bermoral, melanggar akhlak dan menyenggung perasaan dan hak orang lain.

Logiknya, dengan latihan disiplin dan manusiawi seperti ini, Muslim yang berpuasa akan berupaya juga untuk mengawal dirinya daripada mengambil rasuah, melakukan salahguna kuasa, mencabul hak asasi manusia lain, berlaku zalim ataupun lain-lain kecemasan dan ketirisan dalam memegang amanah yang diberikan kepadanya.

Puasa juga dapat membina sikap empati dalam jiwa mereka yang berpuasa terhadap golongan yang kurang bernasib baik. Sikap empati sedemikian bertepatan dengan konsep taqwa dan kebijakan (al-bir) yang dianjurkan oleh al-Quran. Sikap empati tersebut jugalah yang akan membangkitkan perasaan solidariti sejagat dan semangat peduli terhadap masyarakat sekeliling dan warga dunia yang bernasib kurang baik.

Seperti yang ditunjukkan Nabi Muhammad SAW, Ramadhan adalah bulan untuk membuat kebaikan, membantu mereka yang serba kekurangan. Ia juga bulan untuk menyebarluaskan usaha kebaikan, agar Rahmat dan

Sudah sampai waktu untuk kita bersama-sama secara lebih giat membina pusat-pusat jagaan dan institusi-institusi pendidikan OKU menerusi derma, waqaf dan zakat.

rezeki Allah dapat dinikmati oleh semua warga manusia, termasuk non-Muslim sekalipun.

Ramadan juga perlu dihidupkan dengan semangat solidariti, empati, dan kebijikan, selaras dengan seruan Allah dalam surah Ali Imran, ayat ke-93:

"Kamu tidak akan mencapai kebijikan sehingga kamu mengorbankan harta yang paling kamu suka di jalan Allah (dengan membantu orang lain), dan apa sahaja yang kamu korbankan (di jalan Allah), Allah pasti mengetahuinya."

Apabila disebut "kebijikan" dan "derma", kebanyakan orang membayangkan surau, masjid, rumah anak yatim, maahad tafhib dan sebagainya. Namun, rasanya telah banyak usaha membangunkan institusi-institusi sedemikian.

Telah sampai waktu para hartawan, jutawan, dan dermawan Muslim membantu membina pusat-pusat jagaan dan pusat-pusat pendidikan OKU yang diuruskan

oleh pakar dan pendidik profesional dalam bidang tersebut.

Pada zaman Turki Osmaniah dahulu, waqaf bukan saja dibuat untuk membina sekolah, masjid, hammam (bilik mandi), taman, pancuran air, hospital, malah juga untuk memelihara dan memberi makan kepada binatang dan burung merpati.

Sudah sampai waktu untuk kita bersama-sama secara lebih giat membina pusat-pusat jagaan dan institusi-institusi pendidikan OKU menerusi derma, waqaf dan zakat.

Dana zakat boleh disalurkan kepada keluarga yang tidak berkecimpung untuk membiayai pendidikan khas anak-anak OKU, membeli keperluan mereka, ataupun mengajukan pemban-tu-pembantu terlatih untuk mendidik anak-anak OKU.

Kita selalu terlepas pandang soal OKU, Ramadan kali ini adalah kesempatan untuk kita mengubah sikap dan tindakan.

Ramadan dan mesej keamanan

Oleh WAN JI AT-TA'ADUDI



Dalam tradisi Muslim, dipamerkan bahawa manusia itu sentiasa berinteraksi dengan akal dan nafsu. Quraish Shihab, ulama tafsir terkemuka Indonesia, menukilkan komentar al-Qushairi dalam risalahnya yang menyatakan bahawa, "Nafsu dalam pengertian kaum sufi adalah sesuatu yang melahirkan sifat tercela dan perilaku buruk." Manakala orang yang berakal pula menurut Ibn Manzur adalah "orang yang dapat menahan dirinya dan menolak daripada mengikut hawa nafsunya."

Hawa-nafsu tidak dapat dibuang oleh manusia, tetapi ia boleh dikawal. Jika ia boleh dibuang, sudah pasti hilang kesempurnaan diri manusia, kerana antara fitrah manusia ialah kehendak berkahlwin, mengurus ekonomi, bersahabat dan berbagai lagi. Namun, kehendak hawa nafsu itu dikawal dengan akal, menjadikan manusia berekonomi secara amanah, berkahlwin sehingga tidak menyalimi isteri atau suami, bersahabat yang tidak dia khianati.

Aturan al-Quran, dari sudut amalan syariat tidak jauh berbeza daripada rasional akal dalam menilai sesuatu itu baik dan buruk. Sebabnya, hakikat penurunan wahyu al-Quran adalah untuk memastikan manusia berada dalam kebaikan, di samping memastikan kerosakan tidak berlaku kepada manusia. Perkara ini dinyatakan oleh al-Imam al-Baidhawi

yang pernah menyatakan: "Setiap suruhan dalam syariah itu semestinya memberi kebaikan kepada makhluk, dan setiap larangan itu sudah pasti terdapat keburukan di sebaliknya."

Al-Qaradawi juga ada menyatakan: "Allah SWT tidak halalkan sesuatu kecuali ia akan ada kebaikan, dan tidak akan haramkan sesuatu kecuali ada keburukan di sebaliknya."

Apabila dinilai sebegini, kelebihan bahawa sifat bagi nafsu adalah menyeru kepada kerosakan, sedangkan akal dapat mengawal kehendak nafsu yang mahu melakukan kerosakan tersebut. Kedatangan Islam dari sudut pengamalan syariah pula seperti guru yang mendidik akal agar mengawal nafsu yang mahu melakukan kerosakan tersebut.

Puasa

Amalan puasa adalah amalan tradisi manusia beragama, termasuk agama bukan-Islam. Quran menyebut bahawa puasa juga wujud dalam syariat lain sebelum kedatangan Nabi

Muhammad saw, dalam bentuk yang berbeza.

Dalam keadaan bentuk puasa berbeza, tujuan puasa itu tetap satu, iaitu mahu menjadikan manusia itu bertaqwah, menyelamatkan diri mereka sendiri dan orang lain daripada tindakan yang boleh menjadikan diri mereka dihumban ke dalam neraka. Hal ini, dipamerkan dalam ayat ke-183 surah al-Baqarah: "Wahai orang-orang beriman, diwajibkan kepada kamu berpuasa, sepertimana telah diwajibkan kepada mereka sebelum kamu, mudah-mudahan kamu bertaqwah."

Sebulan berpuasa itu sendiri diumpamakan madrasah atau sekolah yang mendidik agar menjadi manusia yang bertaqwah. Manusia yang dilatih untuk tidak melakukan kerosakan sepanjang sebulan Ramadan seharusnya juga meneruskan sikap itu selepas Ramadan.

Puasa, ketaksuban beragama dan perkauman

Antara kerosakan yang dilarang dalam Islam ialah setiap tindakan yang boleh membawa kepada permusuhan, sama ada ia berna-ma provokasi atas nama agama, perkauman sempit dan sebagainya. Kerosakan yang dilakukan seseorang Muslim adalah kesan dari mengikut kehendak hawa nafsu yang sudah pasti tidak selaras dengan falsafah puasa

RAMADAN.

Muslim yang berpuasa bukan sekadar akan melakukan kebaikan, malahan juga akan berusaha memastikan kebaikan itu tersebar, manakala kerosakan semakin terhindar. Lihat sahaja anjuran Nabi Muhammad saw agar memberikan kasih sayang sesama manusia dalam bulan Ramadan, seperti tawaran ganjaran pahala besar dengan memberi makan kepada orang yang berpuasa, penafian pahala puasa bagi mereka yang melakukan sesuatu dosa ketika berpuasa, seperti rasuah, penyelewengan, tidak amanah, khianat dan sebagainya.

Ramadan bukan semata-mata berlapar dan dahaga. Pada falsafah puasa Ramadan terdapat mesej keamanan. Manusia yang menghayati falsafah Ramadan adalah manusia yang tidak akan mencetuskan permusuhan. Malahan, mereka akan menjadi sebagai agen dalam menyuburkan persaudaraan.

Wallahu 'alam.

Rujukan:

- M. Quraish Shihab, *Wawasan al-Quran* (2007, Bandung).
- Ibn Manzur, *Lisan al-Arab* (1414H, Beirut).- Al-Asnawi, *Nihayah al-Sul Fi Syarh Minhaj al-usul* (1999, Beirut).- Al-Qaradawi, *Al-Halal wa al-Haram fi al-Islam* (2002, Kaherah).

Puasa eratkan hubungan sesama manusia

KLUANG, 4 JULAI: Selain menahan diri daripada lapar dan dahaga, kehadiran bulan penuh rahmat ini mampu mengeratkan lagi hubungan sesama manusia, kata Adun DAP Mengkibol Tan Hong Pin.

"Motif ataupun agenda saya untuk turut sama berpuasa tahun ini sebenarnya agar lebih dapat mengenali tradisi dan budaya masyarakat serta rakan-rakan Muslim."

"Walaupun saya 'non-muslim' tapi berdasarkan populasi masyarakat beragama Islam di Malaysia, iaitu sebanyak 60 peratus, saya rasa terpanggil untuk menghayati bulan mulia ini supaya dapat memahami antara satu sama lain," kata Hong Pin.

Beliau berkata, setakat ini ramai rakan-rakan dari Pakatan Rakyat terutama PAS memberi sokongan positif kepada usahanya itu.

"Kebanyakan kawan-kawan menyambut baik usaha saya, begitu juga para penduduk," ujarnya.

Menurut Hong Pin, setakat ini beliau sempat untuk berbuka puasa bersama di rumah Timbalan Pesuruhjaya PAS Johor Mazlan Aliman dan bersahur di kediaman Ketua Pemuda PAS Pusat Suhaizan Kayat.

"Di sini secara tidak langsung, hubungan kekeluargaan kami dalam PR bertambah erat.

"Dengan berbuka dan bersahur bersama juga, kita dapat berkongsi idea bukan saja tentang politik tapi kebudayaan, amalan-amalan masyarakat Melayu dan lain-lain," ujarnya.

Ketua Pemuda (DAPSY) Johor itu pada mulanya me-



letakkan sasaran untuk berpuasa selama seminggu sebagai permulaan, namun selepas berjaya mengharungi cabaran dan dugaan, beliau yakin mampu berpuasa sebulan seperti umat Islam lain.

Katanya lagi, rasional berpuasa yang menjadi amalan dalam Islam bukan hanya menahan haus dan dahaga, menahan hawa nafsu dari terbit fajar hingga terbenamnya matahari, tapi ia juga terbukti baik untuk kesihatan.

Beberapa pakar kesihatan menyatakan, amalan berpuasa baik untuk kesihatan jantung, dapat mencegah penyakit kronik, mencegah obesiti, meningkatkan daya tahan tubuh, menyihatkan ginjal dan mencegah kencing manis

Tahun kedua berpuasa, sudah dapat biasakan diri

KUALA LUMPUR, 5 JULAI: Setelah masuk tahun kedua menjalankan ibadah berpuasa seperti umat Islam, kini beliau sudah dapat membiasakan diri, kata Ahli Parlimen DAP Serdang Dr Ong Kian Ming.

Beliau berkata, langkah beliau untuk turut sama bersama berpuasa adalah sebagai solidariti dan merasai susah-payah rakan-rakan beragama Islam menjalaniinya.

"Tahun ini adalah tahun kedua saya cuba untuk berpuasa penuh dan amat berharap dapat merealisasikannya sehingga Maghrib setiap hari selama sebulan.

"Saya cuba lakukan tahun lepas, tapi hanya mam pu berpuasa selama 25 hari saja kerana 5 hari saya berada di Kota Kinabalu dan Singapura.

"Sebab ini masuk tahun kedua, badan saya pun tidak penat dan sudah boleh biasakan diri, jadi saya tetap dapat bekerja seperti biasa walaupun tidak makan dan minum. Tapi rasa lapar dan dahaga tu akan datang sejam sebelum berbuka," katanya kepada The Rocket.

Kata Kian Ming, dalam kemeriahannya bulan Ramadan ini beliau juga tidak melepaskan peluang untuk mengunjungi penduduk Serdang untuk memberikan kurma dan menghadiri majlis berbuka bersama mereka.

"Beberapa hari lalu, saya bersama Adun Balakong Eddie Ng Tien Chee telah mengedarkan buah kurma di Masjid Taming Jaya.

"Selepas ini, saya akan ke kawasan Seri Kembangan dan seterusnya mengunjungi tempat lain dalam lingkungan Serdang," ujarnya.

Pengumuman Kian Ming untuk berpuasa tahun lalu mendapat reaksi positif apabila ramai pengikut laman Twitternya memuji tindakan beliau itu.

Tidak kurang, ada di antaranya berkongsi petua



hidangan sesuai untuk bersahur, menjemput beliau berbuka bersama dan bermacam lagi.

Pada tahun lalu, beliau telah mengadakan dan mengikuti Program Anak Angkat bagi merasai sendiri pengalaman keluarga masyarakat Melayu-Muslim menjalani puasa.

Di Perak, Adun Pasir Pinji Howard Lee Chuan How turut sama melakukan program serupa.

Bagi Howard, dengan mengalami sendiri agama dan budaya berbeza seperti berpuasa, beliau dapat lebih memahami konsep dan praktik amalan itu sekali-gus merayakan kepelbagaian yang ada di negara ini.

Setiausaha Pemuda (DAPSY) Perak itu menyatakan, melalui kefahaman yang terbentuk, masyarakat akan mampu menjalankan hubungan silaturrahim dan kehumanisan dengan lebih erat.

"Hanya dengan perhubungan yang lebih erat, kita dapat mewujudkan masyarakat aman, makmur, damai dan saling berkasih sayang," kata Howard

Ramadan dan fitrah

Oleh ZAHID M. NASER

"Maka hadapkanlah dirimu ke arah agama yang hanif, yang telah difitrahkan oleh Allah kepada seluruh manusia, dan tidak seharusnya ada perubahan fitrah kepada makhluk Allah, dan itulah agama yang lurus, namun tidak ramai manusia yang mengetahui."(30:30).

Ramadan dan fitrah tak boleh dipisahkan. Fitrah yang dirayakan setelah sebulan berpuasa terkadang dilupakan. Ramai lebih mengingati berapa rakaat yang telah dilaksanakan, berapa juta ringgit telah dia sumbangkan, berapa kalikah khatam mushaf yang dibacanya. Mereka mengira-ngira pahala atas kuantiti ibadah dan ritual yang mereka laksanakan, tetapi tidak mengira pahala atas dasar kualiti ibadah yang mereka kerjakan. Kualiti itulah fitrah yang kita rayakan di setiap sebulan Ramadan yang kita harungi.

Fitrah adalah ketetapan yang ditentukan oleh Allah. Hadis riwayat Bukhari dan Muslim yang menyebut bahawa "Setiap yang dilahirkan itu adalah dalam keadaan fitrah" dimaknai sebagai islam atau penyerahan. Manusia itu ketika dilahirkan bersifat menyerah kepada Allah. Begitu juga alam cakerawala ini. Semuanya ketika diciptakan bersifat menyerah atau tunuk kepada ketetapan yang telah ditetapkan oleh Allah.

Namun, kerana beberapa faktor di sana-sini, makhluk sering melenceng daripada fitrahnya. Terutamanya makhluk yang bernama manusia.

Manusia dikurniakan nafsu keinginan yang selalu mengajak kepada kejahatan. Kerana kejahatan, manusia tidak berafa da di landasan fitrah lagi. Mereka kini berada dalam landasan nafsu dan keinginan yang membuat kepada semua hal. Kalau dia menyukai perempuan dia mahukan perempuan yang ratusan untuk memuaskan dirinya; kalau dia menyukai harta, dia akan menjadi tamak untuk mendapatkan lebih sehingga menghancurkan alam.

Cabarang mengembalikan fitrah yang melenceng

Fitrah kemanusiaan itu mempunyai sifatnya yang tersendiri. Antara sifat fitrah manusia adalah untuk menjadi seorang yang bahagia, menginginkan keadilan dan kejujuran, menginginkan hal yang bagus-bagus.

Agama kemudian datang memberikan nilai yang penting untuk memandu keinginan manusia, misalnya agar seseorang yang ingin menjadi hartawan tidak memilih untuk mengambil harta orang secara tipu dan paksa, secara rasuah dan ugut.

Fitrah manusia juga menolak ketidakadilan, menolak peras ugut dan rasuah, menolak penyalahgunaan kuasa dan menolak ekstremisme dalam segala hal. Namun keinginan keduniaan telah membuatkan manusia lupa akan fitrahnya.

Maka di sinilah agama, menerusi ibadah seperti puasa, me latih manusia untuk kembali kepada fitrahnya yang "menyerah" dan tidak bergantung pada "raga" seperti dunia, yang sebenarnya dapat membantutkan potensi manusia.

Ketakwaan dan keadilan

Di akhir ayat 183 surah Al-Baqarah, Allah menyebutkan ibadah berpuasa adalah untuk mendapatkan ketakwaan bagi meluruskan fitrah kemanusiaan: "Wahai orang-orang yang beriman, kalian diwajibkan berpuasa sebagaimana diwajibkan ke atas orang-orang sebelum kamu, agar kalian menjadi dari kalangan orang yang bertakwa."

Antara ketakwaan yang ingin didapatkan oleh setiap orang adalah ketakwaan yang sangat dekat dan intim dengan keadilan.

Dewasa ini, keadilan adalah hal yang hilang daripada umat Islam. Padahal, fitrah yang menginginkan keadilan itulah yang akan membolehkan individu mencapai darjah ketakwaan yang sempurna: "Berlaku adillah, sesungguhnya ia sangat dekat kepada takwa."

Sebuah syair masyhur Al-Hati'ah (wafat 678H), penyair jahiliyah yang masuk Islam pada zaman Khalifah Abu Bakar, pernah menyebut tentang bagaimana fitrah kebahagiaan itu ada pada takwa: Aku merasakan, kebahagiaan itu bukanlah mengumpul harta banyak, Tetapi ketakwaan kepada Allah itulah kebahagiaan, Takwa Akan Allah itulah sebaik-baik simpanan, Ketika disisi-Nya, orang yang paling bertakwa akan mendapat bahagia dari ketakwaannya. (Diwan Al-Hati'ah).

MERDEKA, DARI MATA ORANG MUDA

Lapan orang ahli politik muda Malaysia diberi lima soalan yang sama. Soalan yang saban tahun ditanya dan selalunya menemukan jawapan berbeza. Di saat negara dirundung keresahan ekonomi dan permasalahan perkauman, sambil mengira hari menuju ulangtahun Merdeka ke 57, harapan kita terletak di tangan anak-anak muda. Apa kata mereka?



HOWARD LEE

1 Semangat Merdeka adalah emosi yang merangkumi perayaan, kesyukuran, sambutan dan mengenang tuntutan kebebasan kita sebagai sebuah bangsa.

2 Merdeka memainkan peranan amat penting, untuk mengingatkan bahawa perjuangan Merdeka masih belum selesai. Kebebasan tidak berguna jika pemikiran masih terpenjara. Konsep dan impian merdeka masih amat relevan dalam lanskap politik hari ini, walaupun kita bebas daripada penjajahan British, kita masih perlu kerja keras untuk mencapai kebebasan daripada penjajahan UMNO-BN.

3 Putera-AMCJA. Mereka adalah kumpulan yang berjaya mengusahakan aksi politik besar-besaran, seperti Hartal '47, yang tidak berasaskan kerangka perkauman. Mereka juga bertanggungjawab menawarkan alternatif kepada perlembagaan yang dirangka tanpa penglibatan warga Malaya. Alternatif itu dikenali sebagai Perlembagaan Rakyat.

4 Malaysia yang menyambut baik perbezaan kaum, budaya, dan agama sebagai suatu keindahan dan bukannya halangan. Sebuah Malaysia yang benar-benar bebas daripada penjajahan minda oleh pihak berkuasa, bebas daripada kezaliman penyuas; Malaysia yang berjaya mengembalikan keyakinan rakyat terhadap institusi-institusi awam.

5 Membuka pertandingan kepada rakyat jelata untuk mengadakan sambutan paling kreatif. Kemudian, pada hari Merdeka, saya akan mengurangkan siaran acara sambutan di Dataran dan menggabungkannya dengan siaran langsung daripada majlis sambutan paling kreatif di setiap negeri.



DYANA SOFYA

1 Semangat Merdeka adalah semangat cintakan tanah air, kesetiaan kepada negara yang tidak berbelah-bahagi dan sanggup membuat apa saja demi untuk kepentingan semua rakyat Malaysia, walaupun melawan arus. Menyoal pihak berkuasa demi kepentingan negara adalah semangat patriotik dan bukannya khianat.

2 Dengan mengingatkan dan meniup kembali semangat patriotisme barulah kita semua dapat bersatu sebagai rakyat Malaysia yang berpadu dan seterusnya menyelesaikan banyak masalah negara kita yang lahir daripada usaha "pecah dan perintah" oleh sesetengah pihak.

3 Tunku Abdul Rahman, kerana pemikiran beliau yang berwawasan dan pendekatan diplomatiknya. Beliau adalah seorang negarawan yang komited dengan prinsip-prinsip beliau. Ini mengingatkan saya kepada satu lagi negarawan agung yang dekat dengan kita, Karpal Singh. Kata-kata Tunku yang paling saya gemari: "According to Mahatma Gandhi, a leader is a servant and offers himself to serve: his duty must therefore be to make sacrifices. That is the only meaning I know and that will be my guide and inspiration as a leader."

4 Malaysia untuk semua rakyat Malaysia. Seperti yang divisikan oleh Bapa Merdeka Tunku Abdul Rahman. Negara untuk semua tanpa mengira keturunan dan latar belakang.

5 Mengingati sejarah kemerdekaan yang sebenar dan bukannya sekadar luahan seperti yang terdapat dalam buku sejarah sekolah menengah. Untuk menjawab soalan ini, kita boleh bertanya, "Kalau Yasmin Ahmad hendak menghasilkan filem berkenaan perjuangan kemerdekaan, apa yang akan beliau lakukan? Bagaimakah pen-



ADAM ADLI

1 'Semangat Merdeka' buat saya adalah apabila kita menginsafi kembali sejarah dan membongkar kembali penindasan sejarah itu sendiri demi keadilan buat mereka yang ditindas oleh sejarah tersebut. Dalam konteks kontemporari; semangat Merdeka diwakili dengan kebencian melihat sebarang bentuk ketidakadilan, penipuan, pembodohan dan penindasan bangsa negara.

2 Tidak memahami Merdeka dan sejarah semasanya akan membuatkan bacaan politik hari ini jadi meleset. Dasar-dasar yang sedang diguna pakai hari ini, pasti ada sangkut-paut dengan apa yang dibentuk di sebalik sejarah Merdeka itu.

3 Ibrahim Yaakob. Kekaguman saya kepada beliau yang juga Anak Kandung Suluh Budiman (gelaran untuk graduan Maktab Perguruan Sultan Idris). Beliau disisih sejarah, namun jika ada yang mahu dianggap sebagai 'Sang Pemula', beliaulah orangnya.

4 Malaysia yang demokratik, bebas daripada pembodohan dan diskriminasi. Malaysia yang tidak dibina daripada kemegahan palsu. Malaysia yang dibina daripada hasil titik peluh orang yang benar-benar berjuang dan berusaha, bukan daripada otak bebal menteri korup.

5 Tidak ada masalah dengan persembahan dan segenap acara yang dijalankan. Di mana-mana pun sambutannya begitu, tetapi yang sudah mengalih perspektif pasti akan sedar betapa kosong sambutan tersebut. Kenapa tak diraikan orang-orang yang berjuang? Satu-satunya imej Merdeka yang diajar dari dahulu adalah turunnya Union Jack. Seolah negara kita tidak terlibat dengan perang. Selesaikan dahulu isu pengisian erti kemerdekaan.



KASTHURI PATTO

1 Memperingati kebebasan daripada cengkaman penjajah, di mana hak-hak kerakyatan dijunjung dan kesaksamaan didukung. Tiada doktrinasi pemikiran dan ideologi oleh golongan penindas.

2 Merdeka amat relevan dan harus kekal sebagai satu bentuk penghormatan kepada kebebasan itu sendiri, serta untuk memperingati semua pejuang kebebasan terutamanya para perwira yang tidak diindang yang telah menyumbang kepada pergelutan dalam mencari identiti Malaysia yang sebenar pasca Merdeka.

3 Selain Bapa Kemerdekaan, tokoh-tokoh lain yang telah menyumbang kepada usaha untuk memerdekakan tanahair mereka termasuklah Janaky Athi Nahappan, wirawati negara yang telah berjuang menentang penjajah setelah mendapat latihan ketenteraan daripada Indian National Army (INA) pada tahun 1942 serta bersama wanita-wanita lain melawat estet-estet menggerakkan kempen pendaftaran kewarganegaraan. Tokoh wanita lain yang wajib diberi penghormatan adalah Shamiah Fakeh.

4 Malaysia hari ini berada di persimpangan yang amat berbahaya. Golongan ekstremis berusaha menjelaskan keharmonian antara kaum. Tetapi dengan semangat perpaduan rakyat Malaysia, saya mempunyai harapan negara yang terluka ini mampu disembuhkan semula, selagi ada keazaman politik yang kuat demi sebuah perubahan.

5 Memberi penghormatan yang tinggi kepada semua pejuang yang dilupakan sejarah, yang hadir dari latarbelakang sosioekonomi dan kaum yang pelbagai untuk menyumbang kepada perjalanan kemerdekaan negara ini. Di London, haiwan pun dikenang. "Animals in War Memorial" didirikan di Hyde Park, untuk memperingati semua haiwan yang telah berkhidmat dan terkorban bersama tentera Britain dan sekutunya dalam perang.

- 1. Apa itu ‘semangat Merdeka’?**
- 2. Sejauh mana Merdeka masih penting dlm konteks politik semasa? Sebab?**
- 3. Siapa tokoh awal Merdeka yg jadi teladan? Sebab?**
- 4. Bagaimana rupa Malaysia yg saudara/i perjuangkan**
- 5. Apa yang anda bosan tentang sambutan hari merdeka oleh kerajaan? Kalau anda pengarah program, sambutan merdeka bagaimana yang anda mahu anjurkan?**



AMIRUDDIN SHARI

1 Semangat merdeka yang bermakna harus menjamin kebebasan, kebersamaan dan kesaksamaan.

2 Merdeka itu sangat penting dan utama. Pemahaman dan kepercayaan kepada kemerdekaan sangat perlu ditanam kepada rakyat sepanjang masa bagi menjamin kehidupan bernegara dan bermasyarakat. Rakyat yang merdeka menjamin kelangsungan kemerdekaan negara.

3 Burhanuddin al-Helmy. Beliau menunjukkan contoh kepimpinan yang berjaya merentasi kekangan kaum, agama dan ideologi. Malahan beliau antara tokoh awal yang berani meletakkan Merdeka sebagai agenda perjuangan. Beliau juga tegas menganggap hak dan keadilan sebagai perkara asas dalam kehidupan negara yang merdeka.

Rujukan melayu yang diutarakan beliau sebagaimana yang tertulis di Perlembagaan Rakyat adalah lebih lebar dan inklusif. Malahan dengan tegas terakhir kata-kata beliau itu menunjukkan sifat tegas beliau bahawa hak dan keadilan adalah perkara asas dalam kehidupan negara yang merdeka.

4 Saya impikan dan akan terus berusaha memastikan suatu hari nanti Malaysia kita ini adalah yang rakyatnya satu bangsa yang berupaya meleraikan prejdis kaum dan etnik serta mampu melindungi, menghargai, dan menghormati setiap warga dengan jaminan hak-hak asas kehidupan.

5 Perarakan, pertandingan cipta slogan, lagu-lagu, ceritera dan bebelan membosankan – semua ini menekan orang muda terutamanya. Program merdeka impian saya adalah program yang memberi ruang kepada semua agar mereka merasakan bahawa negara ini sebenar-benarnya milik mereka.



WONG SHU QI

1 Maksudnya semua warga Malaysia dapat mencapai cita-cita masing-masing tanpa halangan.

2 Merdeka masih penting dalam konteks politik semasa kerana ramai orang telah terlupa bahawa tekanan penjajahan bukan menyasarkan satu kaum atau komuniti sahaja, semua orang pernah ditindas hasil jajahan orang putih. Merdeka adalah hasil perjuangan semua orang, tidak kira kaum dan ideologi politik. Merdeka memberikan hak dan kuasa kepada setiap warga yang menyokong kebebasan daripada penjajahan.

3 Tunku Abdul Rahman. Beliau meletakkan asas perjuangan membina sebuah negara yang adil, demokratik, dan saksama, tanpa batas-batas perkauman, ekstremisme agama maupun perbezaan ideologi politik.

4 Kekuatan Malaysia adalah kepelbagaian bahasa dan budaya yang kita miliki. Saya berharap Malaysia akan menjadi satu negara yang dikagumi seluruh dunia dengan kekuatan warga Malaysia yang mampu memahami pelbagai bahasa dan budaya berbilang kaum. Paling penting, anak muda negara ini boleh merasakan bahawa impian mereka pasti mampu dicapai.

5 Sambutan hari Merdeka anjuran kerajaan telah jadi satu format agar mengingatkan orang ramai bahawa hari bersejarah tersebut sekadar hari merdeka sahaja dan melupakan maksud kemerdekaan. Kalaulah saya menjadi pengarah program, sambutan Merdeka pastinya membuka ruang kepada golongan minoriti, termasuk kelas yang terlepas pandang dekat arus perdana.



ZAIRIL KHIR JOHARI

1 Pada saya, semangat Merdeka adalah semangat kesepakatan semua rakyat Malaysia, tidak mengira kaum, dalam matlamat membina negara bangsa yang bebas, harmoni, maju, dan terangkum, seperti yang diimpikan oleh pemimpin-pemimpin kemerdekaan.

2 Peristiwa Merdeka harus senantiasa menjadi iktibar kepada rakyat. Sekiranya para pemimpin dan masyarakat berbilang kaum tidak bersatu pada masa itu, sudah tentu kemerdekaan daripada cengkaman penjajah tidak akan tercapai. Maka perpaduan itu adalah nilai yang harus kita amati.

3 Arwah Ayahanda saya menjadi teladan saya. Beliau tidak pernah jemu mengingatkan saya bahawa tiada pengganti kepada kerajinan dan usaha sendiri. Antara nasihat beliau yang suka diulangi adalah, “no one owes us a living.” Segala apa yang kita mahukan hendaklah diusahakan sendiri dan kita tidak harus mengharapkan bantuan sesiapa. Walaupun nasihat ini adalah nasihat peribadi, namun saya rasa iktibar ini boleh diambil bagi masyarakat secara umum.

Sekiranya Malaysia ingin menjadi negara maju yang berdaya saing, maka rakyatnya harus berdiri atas kaki sendiri dan tidak selalu mengharapkan kerajaan dan pemimpin.

4 Malaysia yang bebas, adil dan saksama, yang tiada batasan ke atas impian setiap seorang rakyat Malaysia, dan yang dapat menjamin keadilan sosial, ekonomi dan politik melalui institusi-institusi awam yang utuh.

5 Saya tiada kepakaran untuk menjawab soalan ini. Namun saya lihat sambutan Merdeka saban tahun tidak cukup menghargai dan menghayati sumbangsan dan wawasan tokoh-tokoh pelopor kemerdekaan serta semangat Merdeka yang dibawa mereka.



ANIS AFIDA

1 Suatu perasaan ingin bebas daripada sebarang bentuk penjajahan demi kecintaan kepada negara.

2 Merdeka masih penting dalam konteks politik hari ini, malah sampai bila-bila. Negara yang merdeka ialah sebuah negara yang tidak bergantung kepada mana-mana kuasa asing untuk maju. Generasi sekarang yang lahir selepas merdeka harus dididik supaya mencintai negara serta bersama-sama mengelakkan keharmonian dan kerukunan hidup tanpa batas agama dan bangsa.

3 Prof. Dr. Burhanuddin al-Helmy kerana beliau dikenali sebagai tokoh reformis, tetapi disenangi oleh ulama kaum tua; terkenal sebagai ahli tasawuf, tetapi rapat dengan kaum muda. Beliau menyusun strategi dakwah dengan mendekati golongan sosialis-komunis, memulakan kerjasama dengan parti-parti bukan-Melayu tanpa rasa perkauman, mendukung perjuangan nasionalis, tetapi kekal sebagai tokoh yang Islamis.

4 Kita memperjuangkan Malaysia yang benar-benar bebas daripada rejim penjajahan fizikal dan minda. Selain itu, kesejahteraan rakyat mestilah dijadikan agenda utama negara.

5 Sambutan merdeka berkONSEPkan hiburan berlebihan membosankan. Seandainya diberi peluang, saya akan memastikan bentuk program bersifat mendidik dan memberi maklumat di samping tidak menafikan keperluan hiburan sederhana yang mendidik jiwa, selain memastikan semua tokoh kemerdekaan dihargai dan diketengahkan, bukan hanya menjulang tokoh tertentu sahaja.



PADA GIGITAN PEAR PERTAMA

Oleh ALIFF FIKRI

Harapan, atau asa menurut Kamus Pelajar Edisi Kedua, adalah bentuk dasar dari kepercayaan kepada sesuatu yang diinginkan di masa hadapan. Harapan ini berbentuk abstrak, tidak nampak tapi diyakini akan terwujud dengan melakukan praktik seperti berdoa atau berusaha.

Beberapa pendapat menyatakan harapan adalah eskapisme – atau kata sopannya, terapi – dari proses sistematis dalam psikologi untuk menyangkal pemikiran negatif atau pesimis. Jadi, harapan, sebenarnya hanyalah khayalan. Mana mungkin khayalan kita jadi kian sebagai teman karib dalam meniti liku-liku kehidupan.

Kau tahu bukan? Harapan adalah pengkhianat paling agung. Kerana melalui kita mengenal kesenangan, teruja, ketawa dan terbang melayang entah ke mana. Lalu kemudian sekilip mata tanpa persiapan atau tanda kita dipaksa jatuh, tersungkur menyembah bumi. Barangkali hidup ini terlampaui tidak bermakna seperti minyak kelapa lama, busuk baunya.

Pada sebuah harapan, sering juga terselit hal-hal remeh. Misalnya untuk memilih antara kebab daging atau nasi beriani, bazar ramadan Kampung Baru atau Datuk Keramat, sokong Argentina atau Jerman, Lionel Messi atau Mesut Oezil, ruang luas atau kubikel.

"Hujan semalam adalah cara planet ini menulis puisi," kata si lelaki.

Dia sendirian, duduk di bangku beranda sebuah kediaman di tengah ibu kota. Dia melihat ke bawah, ada sebuah taman, kelihatan sepasang kekasih sedang menyantap makanan di bulan Ramadan dan sebuah pokok lebat yang gugur daunnya boleh membangkitkan berahi.

Hujan semalam sedikit sebanyak telah membersihkan kotoran di taman. Kotoran dari sampah bungkus nasi goreng, roti

Jika adil, hidup akan jadi sangat membosankan.

Ketidakadilan membuatkan manusia liat dan kuat. Manusia menakluk ketidakadilan dan membuat gagasan baru peradaban.

john, susu kotak dan bekas kondom di atas jongkang-jongkit.

Kita pasti terfikir dan tertanya-tanya siapa pula yang begitu gila melepas berahi berjongkang-jongkit di taman? Tapi watak kita, si lelaki ini tidak peduli semua itu. Apa yang dia pedulikan adalah bagaimana untuk keluar dari tempat dia sedang berada. Dia tidak senang hidup dalam keadaan terkunci dan sedang mencari jalan untuk membuka mangga kunci yang mengurungnya hampir setengah hari.

Lagipun, dia faham benar fungsi taman dalam seni bina, iaitu sebagai tempat melepas kekusutan, kelesuan dan kejemuhan mengulang rutin harian.

Beberapa tahun lalu, dia telah mengambil keputusan nekad untuk keluar dari kediaman wanita yang dia cintai. Cinta, kata yang tidak pernah jelas definisi dan maksudnya, sama ada sayang, suka atau obses. Tapi dari rona mukanya, dia memang sedang kecewa. Kecewa membuatkan dia dapat melihat negativiti di mana-mana.

"Sepatutnya Tuhan meletakkan label peringatan pada setiap wanita, 'jangan pan-

dang, dekat dan tegur jika takut dilamun mabuk asmara,' katanya berdialog seorang diri.

Cerita ini akan terus berbicara dalam keadaan monolog, sedikit curahan hati penulis yang menggunakan karakter dalam tulisannya. Terpulang pada anda untuk menerima, geli atau apa pun, kerana itulah prosa. Kadang penulis jujur, kadang dia (saya, aku) berdalih sebagai proses kreatif. Tapi ini semua tidak penting. Ada hal yang lebih penting untuk dibicarakan.

"Seharusnya ada cara lebih mudah, ringkas dan singkat untuk jatuh cinta. Tanpa harus memendam perasaan," kata lelaki itu, lantas mengesat hingus yang keluar dari hidungnya.

"Mengapa dalam cinta, tidak pernah ada katalog yang boleh dipesan melalui telefon. Selepas pesan, sampai, nikmati secara biasa, jika sudah tidak mahu, boleh buang ke tong sampah, tanpa beban, seperti sisa makanan," keluhnya.

Jika adil, hidup akan jadi sangat membosankan. Ketidakadilan membuatkan manusia liat dan kuat. Manusia menakluk ketidakadilan dan membuat gagasan baru peradaban. Sekali lagi, ini semua tidak penting, yang penting sekarang adalah kita harus menunggu mengapa watak dalam tulisan ini duduk sendirian, dikunci dalam sebuah kediaman di tengah kota pada tengah hari yang begitu membosankan.

"Sex contains all, body souls, meaning, proofs, purities, delicacies, results, promulgations.

"Songs, commands, health, pride, the maternal mystery, the seminal milk, all hopes, benefactions, bestowals, all the passions, loves, beauties, delights of the earth.

"All the government, judges, gods, follow'd persons of the earth, these are contain'd in sex as parts of itself and justifications of itself," kata penulis realisme, Walt Whitman dalam puisinya 'A Woman Waits for Me'.

Sang lelaki bermonolog lagi.

"Tapi cinta tidak semudah seks, cinta itu rumit. Lebih rumit dari Paradoks Zeno atau segmen 'Night and The Night's Travelers' dalam novel Asleep karya Banana Yoshimoto."

"Dalam Paradoks Zeno, Achilles tewas dalam perlumba dengan seekor kura-kura. Asleep pula menceritakan percintaan dua orang sepupu Yoshihiro dan Mari. Kematian Yoshihiro selepas itu membuatkan Mari turut mati secara literal dan emosi. Dia tersepit dalam persimpangan sebuah kematian."

"Punca semua ini adalah jarak. Jarak pembawa segala masalah."

Dia memandang semula ke taman, kemudian ke jalanraya. Penjual murtabak, Nasi Kerabu, sedang bersiap-siap. Anak-anak kecil yang baru pulang mengaji kelihatan riang gembira dan seorang wanita muda berambut pendek, bermata liar, membawa sebuah buku turut kelihatan. Mereka semua melintasi beranda tempat watak lelaki sedang bermonolog, tanpa berkata apa-apa, seolah-olah dia tidak wujud.

Si lelaki tertarik pada wanita itu, dia tidak cantik. Jauh sekali untuk dibandingkan dengan Pevita Pearce dalam filem Tenggelamnya Kapal van der Wijck. Tapi wanita itu punya pesona lain.

Pesona asing seperti pertama kali membaca buku dan tidak dapat berhenti. Atau pertama kali mendengar lagu hingga kau ulangnya berulang kali. Wanita itu punya karisma seperti itu. Karisma untuk kau menyukainya tanpa alasan.

"Menjadi wanita dan perempuan itu susah, lebih susah dari menjadi watak lelaki dalam

sebuah cerita. Jika penulisnya juga wanita, ia akan ditulis jadi maha hebat, maha kuat, maha angkuh dan sangat berdikari. Padahal bukan semua begitu, bukan semua seperti Maria Alyokhina (Pussy Riot) atau Margaret Thatcher.

"Tapi bila penulisnya lelaki. Wanita akan dijadikan nakal, liar dan penuh menghairahkan. Padahal tidak juga demikian. Ya, lelaki, otaknya hanya penuh dengan seks dan bola sepak saja," katanya, menyerang gendernya sendiri.

Angin panas tengah hari berhembus. Di sisi lelaki itu ada sebiji buah pear yang telah digigit sedikit sahur tadi. Buah pear berwarna hijau ranum yang isinya memutih kini mula menguning, tanda terlalu lama dibiarakan setelah gigitan pertama. Barangkali hidup juga seperti itu, seperti gigitan pear pertama. Kesempurnaan buah terus hilang setelah digigit, lalu kusut, busuk, menua dan dimakan usia.

"Kau cakap apa ni?" soalnya pada diri sendiri.

"Aku sedang jatuh cinta, kau tahu kan?"

"Ya, aku tahu. Tapi kenapa sampai melalut dan bersedih-sedih?"

"Siapa cakap sedih. Aku melalut sebab gembira. Jatuh cinta dan terkoyak sampai tinggal sisa itu menyenangkan."

"Teruk dah kau ni."

"Jangan risau, lagipun ini kali pertama aku jatuh cinta secara keterlaluan."

"Eh, bukan semalam kau cakap jatuh cinta dengan minah Kota Damansara ke? Kau ni, tak boleh tengok awek cantik sikit. Mudah sangat jatuh cinta, tak bosan ke tiap minggu jatuh cinta?"

"Tapi aku yakin ini yang terakhir."

Lepas penat berbicara serius, dia menukar nadanya. Kini dia memikirkan tentang buah pear yang ada di sebelahnya, perlu atau tak perlu sisanya buah pear yang menguning itu dihabiskan.

"Cara manusia bertahan hidup adalah perkara paling menarik," katanya sambil memandang pear yang berada dalam genggaman tangan.

"Bagaimana kita memangsakan makhluk lain untuk bertahan hidup. Memangsa daya hidup makhluk lain yang lebih lemah, lalu mengubahnya menjadi tenaga dan terus berkembang biak."

"Itulah cinta. Tentang bagaimana manusia mencari hubungan agar mendapat apa yang dinamakan sebagai kasih-sayang."

"Kasih sayang itu 'overrated'. Manusia buta sebab kasih-sayang. Hormon Endorphin atau kimia yang berhasil ketika bersama kekasih itu tak jauh beza dengan hormon ketika kau menang pertandingan catur."

"Kau salah, cinta itu bukan sekadar hormon. Cinta adalah soal lain, soal memerlukan atau diperlukan."

Monolog itu semakin meriah. Semua suara hati yang entah dari mana mahu bercerita, ambil bahagian, didengar dan berpendapat. Tentang kasih sayang, menjadi rasional dan berahi.

Kemudian datang dua orang wanita berpakaian putih membawa kerusi roda. Menuju ke arah lelaki itu, wajah mereka kelihatan penat, tanpa perasan dan tanpa emosi.

Seorang dari mereka membuka mangga kunci, lalu berkata:

"Encik Rosman, jom kita keluar. Doktor nak jumpa, lagipun sekarang kan dah masuk waktu makan ubat," kata salah seorang dari wanita itu.

Pintu dibuka, zohor telah berlalu, lelaki itu yang terkurung sekian lama, akhirnya boleh keluar untuk ke tempat kurungan lain dan menjalani 'kerja-kerja' seperti kebiasaannya.

PUISI

Berehat di sisi paus

Oleh ZAHID M. NASER

Sudah sejuta batu kami berjalan,
kepenatan mulai merayap seluruh tubuh,
kepeningan meraba fikiran.
Juga kehantuan
cuba menggoda
kelopak mata kami berdua.

Perjalanan kami terhenti.
“Pak, lihat itu!”
kami menjumpai
seekor paus
terdampar
tercungap meminta
air dan gula.
Ekornya luka.

kami memberinya air
paus berterima kasih.
“Alangkah baik hati anda!”
kami tersipu malu.

“Paus, bisakah kami memelukmu?”
Hasan dan Aku bersungguh meminta.
“Silakan!”
“Namaku Biru.”
kami lena seribu purnama
di sisi Biru.

*Sajak ini adalah cebisan daripada buku Petualanganku dan Hasan yang akan terbit tidak lama lagi.

PANTUN

Pantun berkasih-sayang

(dari buku Mohd. Taib Osman, Warisan Puisi Melayu)

Layang-layang terbang melayang,
Jatuh ke laut disambar jerung,
Siapa kata abang tak sayang,
Jikalau bunga rasa nak gendong.

Ada satu anak gelanggang,
Sehari-hari turun ke pantai,
Jika sehari tak ku pandang,
Sebagai bunga layu di tangkai.

Bunga Melur di atas titi,
Mari dibungkus dalam kertas,
Dalam telur lagi dinanti,
Inikan pula sudah menetas.

Anak beruk di kayu rendang,
Turun mandi di dalam paya,
Hodoh buruk di mata orang,
Cantik manis di mata saya.

Lama sudah tidak ke ladang,
Padi sudah dililit kangkung,
Selama tuan tidak kupandang,
Putus hati pengarang jantung.

Malaikat hinggap di Kaherah

Oleh HAMDY EL-GAZZAR

Pada satu malam bulan penuh di bulan Rejab, secara tepatnya di malam keempat belas, satu malaikat kecil muncul di langit Kaherah. Tampaknya dia sedang sesat. Barangkali dia sedang dalam ziarah ke seberang laut Mediterranean menuju ke utara, ke benua Eropa. Atau barangkali dia sedang terbang ke Timur menuju Semenanjung Arab dan Teluk Persia. Entah bagaimana, dia tiba di tengah kota Kaherah. Dan kerana dia malaikat polos yang sedang sesat, datang dari syurga kayangan, tak siapa dapat mengecam diri sebenarnya. Dia dapat melihat dan mendengar semua orang, tapi pada mereka dia terlihat seperti seekor burung putih yang bebas berterbang ke mana saja yang diingini.



Malaikat kecil itu mendarat di jambatan besi tua Qasr al-Nil, menetap buat seketika untuk menatap sungai Nil di bawah dan bulan penuh di atas. Sekelilingnya sepi dan tampak biasa. Kereta-kereta dan bas-bas mengangkut manusia dari satu tebing sungai ke yang satu lagi. Di sekelilingnya, pasangan kekasih bercengkerama, berbicara melalui mata, lidah dan sekulimit tanda. Mereka saling mencuri pandang dan berbalas layangan kucukan. Memandang mereka, begitu indah dan menenangkan, membuka hati si malaikat. Dia berkata pada dirinya, “Ini sebuah kota yang kenal cinta.”

Selepas seketika, dia terbang menuju Dataran Tahrir, dengan senyum dan hati yang senang. Di hujung dataran, bersebelahan sebuah restoran Amerika yang terkenal, dia mendarat dekat sebuah gerai akhbar dan buku yang di belakangnya duduk seorang lelaki tua yang menarik minatnya. Lelaki tua itu berbual-bual dengan pelanggan, berjenaka tentang semua perkara – barang jualan, pelanggan, dan hal-hal yang sedang berlaku di negara itu. Malaikat membaca tajuk utama di muka akhbar-akhbar besar tapi tidak mampu untuk benar-benar memahaminya, sekadar tahu bahawa negara itu baru saja hendak memilih presiden baru daripada dua orang calon dan keputusannya tampak hampir jelas.

Tatkala gelak tawa si lelaki tua semakin rancak tanpa sebarang sebab yang nyata, si malaikat kecil tersenyum dan berkata pada dirinya, “Ini sebuah kota yang kenal jenaka, sebuah kota yang mesra.”

Si malaikat kemudian memandang ke arah Dataran Tahrir yang terkenal dan melihat seorang lelaki tua kesedihan kerana baru kehilangan anak dan cucu apapun yang mampu dia lakukan hanyalah berdiam diri. Kerana hati si malaikat itu kudus, suci dan tiada noda, dia berkata pada dirinya, “Sesiapa yang tak kenal kesedihan bukanlah manusia.”

Si malaikat terbang ke taman El Sienia di tengah-tengah dataran, dan mendarat dekat sekelompok lelaki dan perempuan muda. Dia mendengar perbualan mereka:

- Kita telah buka pintu-pintu neraka.
- Kita tak boleh terima fasisme agama.
- Kalau begitu, dukunglah fasisme militer.
- Allah ada berfirman tentang hal ehwal ciptaan-Nya, Dia membiarkan manusia yang zalim untuk memerintah manusia lain yang zalim.
- Kita perlu membina sebuah negara moden demokratik.
- Revolusi diteruskan.
- Kita adalah orang yang menafikan keindahan lelaki ini adalah pahlawan rakyat dan telah membebaskan kita daripada pengganas dan orang kafir.
- Orang miskin harus diutamakan.
- Kita tak muahu kerajaan militer atau agama.
- Ada beribu-ribu tahanan di dalam penjara.
- Di saluran-saluran televisyen dan dalam kereta-kereta mewah, ada kumpulan korup yang menyokong fasisme.
- Aku akan terus melaungkan “Kehidupan, kebebasan, keadilan sosial, dan kemanusiaan” sehingga mati.

Si malaikat mendengar lebih banyak pernyataan sambil bunyi bising dan perdebatan menjadi semakin kuat.

Dia memerhatikan raut lelaki-lelaki dan perempuan-perempuan muda itu dan berasa simpati terhadap mereka. Kesudahannya dia sedar bahawa setiap daripada mereka yang muda itu berpendapat mereka tahu apa yang nyata, apa yang betul dan salah. Dia tahu mereka berasa keliru dan kecewa.

Si malaikat senyum kepada mereka persis seorang pendeta tua. Dia meninggalkan mereka, terbang dan berkata kepada dirinya, “Kehidupan manusia aneh dan unik, dan aku tak memahaminya. Tapi ada sesuatu yang indah tentangnya. Sebuah kelahiran baru pasti akan berlangsung di sini. Tanah ini permai dan orang di sini baik-baik. Barangkali mereka akan berjaya. Mereka pasti berjaya.”

Diterjemahkan oleh Iqhal Ilmam berdasarkan terjemahan Inggeris oleh Reme McGinty

Apa kesudahan derita Indira dan Deepa?

Apakah cara yang lebih tepat bagi menunjukkan gambaran sebenar ketidakadilan dalam sistem di negara kita daripada tindakan Ketua Polis Negara Tan Sri Khalid Abu Bakar dan Peguam Negara Tan Sri Abdul Gani Patail berhubung konflik perbutan anak dua bekas pasangan berbeza agama.

Perkembangan terbaru menyaksikan Khalid dan Abdul Gani memohon kepada Mahkamah Rayuan untuk terlibat dalam kes antara M Indira Gandhi dengan K Pathmanaban (nama Islam, Mohd Ridzuan Abdullah) dan S Deepa dengan N Viran (nama Islam, Izuan Abdullah).

Khalid yang sepatutnya melaksanakan tugas yang termaktub dalam undang-undang termasuk menguatkuaskan perintah mahkamah – kini dengan sendiri masuk campur untuk mencabar keputusan itu.

Menurut laporan, kedua-dua mereka akan memohon Mahkamah Rayuan agar menangguhkan keputusan Mahkamah Tinggi yang mengarahkan polis untuk mengesan Muhammad Ridzuan Abdullah dan Izwan Abdullah.

Ia pasti menyulitkan lagi usaha mencari penyelesaian kes yang mendapat perhatian negara ini dan, paling utama, menambahkan lagi kesengsaraan dua orang ibu, iaitu M Indira Gandhi dan S Deepa, yang sekian lama terpisah dengan anak mereka.

Sehingga kini, anak bongsu M Indira, Prasana Diksa, masih bersama Mohd Ridzuan, manakala anak lelaki S Deepa, Mithran, masih bersama Izuan.

Sebelum ini, Mahkamah Tinggi Syariah Ipoh dan Seremban menyerahkan hak

penjagaan anak kepada Mohd Ridzuan dan Izuan. Namun, keputusan itu dinafikan Mahkamah Tinggi Ipoh tahun lalu (kes M Indira-Mohd Ridzuan) dan Mahkamah Tinggi Seremban 7 April lalu (Deepa-Izuan). Izuan mlarikan Mithran dua hari selepas keputusan itu, atas alasan ‘keselamatan’.

Siapa yang bertanggungjawab?

Tidak cukup dengan itu, penderitaan yang ditanggung Indira dan Deepa kian bertambah apabila tiada pihak yang berani memikul tanggungjawab dalam menegakkan keadilan.

Khalid ‘konsisten’ dengan alasan polis bersikap neutral apabila berhadapan dengan keputusan bercanggah antara mahkamah sivil dan mahkamah syariah, sedangkan banyak pakar perundungan berpendapat kedudukan mahkamah sivil adalah lebih tinggi.

Menteri Dalam Negeri Datuk Seri Ahmad Zahid Hamidi pula pada banyak ketika hanya berlepas tangan, misalnya beliau enggan memberi sebarang kenyataan berhubung tindakan KPN itu ketika ditanya.

Perdana Menteri Datuk Seri Najib Razak, seperti biasa, menghilangkan diri. Lama kemudian baru beliau muncul dan memberikan cadangan yang tidak membantu – meminta kedua-dua bekas pasangan itu mencari jalan penyelesaian di Mahkamah Persekutuan.

Kenyataan itu dengan segera dibidas pelbagai pihak, termasuk oleh Setiausaha Wanita DAP Teo Nie Ching yang menyifatkan Najib sebagai pemimpin yang tidak memahami



undang-undang.

“Keputusan mahkamah adalah muktamad selagi mana ia tidak diketepikan oleh mahkamah yang lebih tinggi. Dalam kes ini, ia tidak dicabar oleh bapa di mahkamah. Maka bagaimana Mahkamah Persekutuan dapat membuat keputusan?” soalnya.

Hubungan ibu-anak melangkaui undang-undang

Namun, lebih daripada segala soal teknikal perundungan, lebih utama sepatutnya adalah fitrah pertalian antara ibu dan anak.

Bukan ingin mengesampingkan undang-undang, tetapi di manakah budi bicara pihak-pihak yang menguatkuaskan undang-undang ini? Apakah yang terdetik di dalam hati mereka, tatkala berpaling daripada rayuan M Indira dan S Deepa?

Jarang keputusan mahkamah, baik sivil maupun syariah, menyerahkan hak penjagaan kepada bapa kecuali terbukti ibu tidak layak atau gagal menunaikan tanggungjawabnya. Dalam kes ini, hak penjagaan diberikan hanya kerana Mohd Ridzuan dan Izuan memeluk Islam, dan membuat keputusan sendiri menukar status agama anak-anak yang tersebut ini.

Barangkali dalam fikiran Najib, Khalid dan Zahid yang lepas tangan, serta Mohd Ridzuan dan Izuan yang mlarikan anak, tindakan mereka adalah untuk mempertahankan agama. Walhal, untuk kesekian kalinya mereka hanya menunjukkan kekuasaan atas nama agama.

Kali ini, korbannya adalah dua orang ibu, insan yang paling dekat dengan anak dan melindunginya sejak sebelum anak itu membunyikan tangisan pertama lagi.

DAP kecam larangan puasa kerajaan China

Oleh AEDI ASRI

MENJUNJUNG prinsipnya selaku parti sekular, DAP menentang keras tindakan pemerintah wilayah Xinjiang di China yang melarang etnik minoriti Uighur yang beragama Islam menjalani ibadah puasa.

Sekular bererti berpendirian bahawa kerajaan dan agama mesti dipisahkan, atau dalam ungkapan lain, kerajaan tidak boleh sibuk-sibuk masuk campur dalam urusan agama warga, termasuk pihak minoriti.

Sejurus berita pengharaman puasa itu tersebar, Setiausaha Agung DAP Lim Guan Eng segera menyuarakan desakan agar kerajaan China menarik balik larangan itu serta-merta.

“DAP amat kesal dengan keputusan yang begitu lapuk dan bertentangan dengan intipati hak asasi manusia dan kebebasan beragama. Atas apa alasan sekali pun, tiada justifikasi yang membenarkan pendidasan dan penganiayaan kepada penganut agama minoriti,” katanya dalam satu kenyataan 4 Julai lalu.

Setelah Guan Eng, Ahli Dewan Undangan Negeri (Adun) Da-

mansara Utama Yeo Bee Yin pula menggesa Putrajaya agar memanfaatkan hubungan diplomatik Malaysia-China untuk mengingatkan Beijing agar menghormati hak umat Islam di sana, bukan sekadar menumpukan perhatian kepada ‘Xing Xing’ dan ‘Liang Liang’ di Zoo Negara.

Larangan ini dilaporkan sudah berjalan sejak beberapa tahun, namun pada kali ini ia mendapat perhatian masyarakat antarabangsa ekoran laporan meluas media.

Antaranya, British Broadcasting Corporation (BBC) 2 Julai lalu mendedahkan, salah satu laman web jabatan kerajaan di sana menyatakan penjawat awam tidak boleh “mengambil bahagian dalam puasa dan acara keagamaan lain.”

Selain itu, laman web stesen penyiaran milik kerajaan Bozhou Radio and TV University turut menyatakan larangan itu dikuatkuaskan kepada ahli Parti Komunis China, guru dan golongan muda.

Penafian Duta China ke Malaysia Huang Hui Kang pula ternyata tidak memuaskan apabila berkata “setakat pengetahuannya, beliau tiada mendengar arahan seumpa-

Bantahan DAP – yang disuarakan segera, tanpa pendekatan “tunggu dan lihat” – dipuji pelbagai pihak, terutama umat Islam di negara ini. Pujian itu memang tepat, walaupun sedikit canggung mendengarnya.

ma itu.”

Ekstremis anti-agama

Ahli Parlimen Bukit Mertajam Steven Sim menyifatkan tindakan itu sebagai ekstremisme ideologi, sedangkan menurutnya, “dalam bulan Ramadan yang mulia ini, ibadah puasa mengajar kita nilai bersederhana, pengorbanan dan membuat amal kebajikan. Malangnya dunia sedang mengalami ekstremisme di merata-rata tempat,” ujarnya.

Menarik jika diperhatikan, ketika kata ‘ekstremisme’ sering dikaitkan kepada agama, kali ini kita melihat Atheisme yang bersikap melampau, dan mangsanya pula adalah

penganut agama.

Sememangnya penyakit ekstremisme boleh sahaja berjangkit kepada mana-mana kumpulan dan individu, asal sahaja ketakutan bahawa pegangan sendiri lebih baik menimbulkan fitrah kemanusiaan yang ada.

Hakikatnya, larangan ini hanyalah secebis kecil daripada senarai panjang penindasan kerajaan China terhadap etnik Uighur di sana yang majoritinya menganut Islam, bersama-sama saudara mereka yang menganut Buddhisme di Tibet.

Untuk membantah tindakan melampau seperti yang dilakukan kerajaan di China itu, Ahli Parlimen Serdang Ong Kian Ming mengemu-

kan cadangan yang menarik pada 3 Julai lalu dengan mengajak warga bukan-Muslim di Malaysia berpuasa sehari sebagai tanda solidariti dengan Muslim di Xinjiang, selain berkongsi rasa sesama umat Islam seluruh dunia.

Perjuangan sekularisme

Bantahan DAP – yang disuarakan segera, tanpa pendekatan “tunggu dan lihat” – dipuji pelbagai pihak, terutama umat Islam di negara ini. Pujian itu memang tepat, walaupun sedikit canggung mendengarnya.

Sebelum ini sesetengah pihak yang memuji itu tidak pernah ambil peduli dengan pembelaan DAP terhadap golongan minoriti (dan sememangnya parti ini sepanjang sejarahnya sentiasa memperjuangkan hak minoriti) – mungkin kerana agama minoriti di Malaysia bukanlah Islam.

Padahal, perjuangan menegakkan kebebasan dan hak beramal semestinya bersifat ‘semua hala’, tanpa mencicirkan mana-mana agama dan kepercayaan.

No.	Barangan	Harga (RM)	KTT	Jumlah (RM)
01	Tsunami Cina: retorik atau realiti? / Lim Hong Siang	15.00		
02	Kluang mencatat sejarah, mencetus impian (DVD) / Genta Media	15.00		
03	Kalender Kreatif: komuniti Kluang impian	25.00		
04	Jangan kelentong lagi kita semua orang Malaysia / Kee Thuan Chye	39.90		
05	Kenangan perjuangan PRU 13 Kluang	15.00		
06	Putrajaya milik siapa / Liew Chin Tong	10.00		
07	Karpal Singh: pantang undur / Melissa Loovi	20.00		
08	Hak untuk berbeza pendapat / Ooi Kee Beng	20.00		
09	Malaysia milik kita bersama / Wan Hamidi Hamid	15.00		
10	Dari penjara ke tumpuk kuasa: Lim Guan Eng / Wan Hamidi Hamid	20.00		
11	Yes, Jom Ubah / Wong Ho Leng	8.00		
12	Bajet: Bagaimana kerajaan membelanjakan wang kita / Teh Chi Chang	20.00		
13	1 Black Malaysia / DAP	15.00		
14	Membongkar Rahsia DAP / Roketkini.com	9.90		
15	Berdialog dengan gereja: sebuah travelog kedamaian / Mujahid Yusof Rawa	25.00		
16	Mengatasi Korupsi Asas-asas / Bertrand De Speville	30.00		
17	Keadilan untuk Beng Hock / DAP			
**BAYARAN POS (RM5 / RM10)				
Peninsular Malaysia	RM5			
Sarawak & Sabah	RM10			
Jumlah				



BARU!

01



Nama: _____	No. Telefon: _____
Alamat Emel: _____	
Alamat: _____	
Perhatian: Semua cek hendaklah dipalang dan dibayar atas nama: Genta Media Sdn Bhd Anda juga boleh membayar terus ke dalam akaun kami di Public Bank 3159 1216 32 Sila faksikan bank-in-slip kepada kami. Untuk sebarang pertanyaan, Sila hubungi 03-9281 8105	
<input type="checkbox"/> Semak untuk langgani. Sertai senarai met kami jika anda ingin menerima maklumat terkini mengenai buku-buku baru kami, dan tawaran istimewa.	
Sila kirim tempahan anda ke: Tingkat 2, Blok A, Wisma Wenworth KL, Jalan Yew, Off Jalan Pudu, 55100, KL. Tel: 03-9281 8105 Faks: 03-9281 8104 Emel: info@gentamedia.com	

Kehabisan Stok?

- Pesan kedai buku untuk mengisi stok
- Hubungi kami: 03-9281 8105

Buku juga boleh didapati di:

gentamedia.com

[gentamedia](#)

BORDERS

tunes

BOOKS Kinokuniya

POPULAR

MPH
BOOKSTORES

myNEWS.com

BORANG LANGGANAN THE ROCKET (EDISI BM)

12 isu (RM12) 24 isu (RM 24)

* termasuk bayaran pos

Jenis Langganan

Baru Membaharu No Ahli: _____

Butir Peribadi

Nama (seperti dalam IC): _____

Jantina : _____ Pekerjaan : _____

No IC : _____

Alamat : _____

Tel (H/O) : _____ (HP): _____

Emel : _____

Sila hantarkan borang langganan kepada alamat berikut:

Genta Media Sdn Bhd

Blok A, Tingkat 2, Wisma Wenworth KL, Jalan Yew Off Jalan Pudu, 55100, Kuala Lumpur. Tel: 03-9281 8105 Faks: 03-9281 8104 Emel: info@gentamedia.com

TSUNAMI CINA: RETORIK ATAU REALITI

"Ternyata buku ini memberi kita kesempatan untuk menjengah sedalamnya gelora dan citacita masyarakat Cina sepanjang lima dekad di negara ini. Kita sebenarnya – khususnya orang Melayu – tidak terasa denyut minda dan debar kalbu masyarakat Cina yang sebenar. Buku ini membuka peluang itu."

- **A. Samad Said, Sasterawan Negara**

**Kini Di Pasaran
RM15**

Butir Bayaran

Cek Kiriman Wang Pos No Slip Bank Masuk _____

Cawangan Bank: _____

Jumlah Bayaran: RM _____

Sila bayar atas nama 'Genta Media Sdn Bhd'

Bank: Public Bank Berhad No. Bank Akaun: 3159 1216 32

Kad Kredit

Nama atas Kad Kredit:

Visa Master

Bank Pengeluaran Kad : _____

Negara Pengeluaran Kad:

Jumlah Bayaran: RM _____

No. Kad Kredit: _____

Tandatangan Pemegang Kad: _____

Saya ingin membuat langganan secara automatik. (Hanya untuk pengguna kad kredit)

Saya sudah baca, faham dan setuju dengan semua Syarat.

Syarat-syarat: * Jangan menghantar tempahan dengan WANG TUNAI. Borang langganan akan diproses dalam tempoh 5 hari bekerja

* Dengan ini, saya membenarkan bank yang dilantik oleh Genta Media untuk mendebitkan akaun kad kredit saya untuk langganan ini.

Kabinet baru Najib: Hanya habuan untuk MCA dan Gerakan

Rombakan kabinet yang diumumkan Perdana Menteri Datuk Seri Najib Razak 25 Jun lalu sebenarnya bukanlah rombakan - tetapi hanyalah 'penggemukan' kabinet.

Manakan tidak, apa yang diumumkan Najib hanyalah penambahan enam menteri baru daripada MCA dan Gerakan, iaitu Datuk Seri Liow Tiong Lai (Menteri Pengangkutan), Datuk Wee Ka Siong (Menteri di Jabatan Perdana Menteri), Datuk Mah Siew Keong (Menteri di JPM), Datuk Lee Chee Leong (Timbalan Menteri Perdagangan Antarabangsa dan Industri), Datuk Chua Tee Yong (Timb. Menteri Kewangan) dan Datin Paduka Chew Mei Fun (Timb. Menteri Pembangunan Wanita, Keluarga dan Masyarakat).

Tiada langsung nama yang digugurkan, mahu pun penukaran portfolio. Maka 'penggemukan' ini bukanlah di atas pertimbangan pentadbiran negara, sebaliknya hanyalah habuan politik untuk MCA dan Gerakan.

Ketika hari pelantikan, Najib sendiri belum pasti akan tugas dua Menteri di JPM - Wee dan Mah. "Kita akan bincang dengan kedua-dua menteri berkenaan dan akan agihkan kepada mereka bidang tanggungjawab mereka," kata Najib.

(Peranan mereka hanya diberikan seminggu kemudian, apabila Wee diperintanggungjawab menjaga hal ehwal masyarakat Cina berkaitan kampung baru dan industri kecil dan sederhana, manakala Mah berperanan antaranya menjaga Unit Inovasi Khas (Unik) dan Lembaga Wakaf Hindu)

Kabinet baru, dasar lama

Timbalan Perdana Menteri Tan Sri Muhyiddin Yassin pula berkata, penambahan itu tidak dapat dilakukan hanya kerana MCA dan Gerakan mengubah keputusan dan ingin kembali menyertai Kabinet.

Maka, mana pertimbangan soal pentadbiran dan rakyat dalam keputusan itu? Tiada!

Yang pasti, perbelanjaan yang diperlukan bagi menanggung menteri-menteri ini semakin tinggi, dengan anggaran RM10 juta setahun. Secara perbandingan, jumlah ini jauh lebih tinggi daripada anggaran untuk menteri di Amerika Syarikat (RM16 juta, untuk 313 juta warga) dan United Kingdom (RM8.54 juta, untuk 63 juta warga).

Setiausaha Agung DAP Lim Guan Eng dalam reaksinya mengkritik rombakan itu yang menjadikan kabinet begitu membusung bagi Malaysia - 35 menteri penuh dan 27 timbalan menteri untuk penduduk sebanyak hanya 28 juta.

Lebih parah, menurut Guan Eng lagi, rombakan itu tidak disertakan dengan apa-apa dasar baru, terutama dalam soal melawan rasuah, pengisytiharan harta menteri dan pencegahan jenayah.

Ahli Parlimen Kluang Liew Chin Tong

Yang pasti, perbelanjaan yang diperlukan bagi menanggung menteri-menteri ini semakin tinggi, dengan anggaran RM10 juta setahun. Secara perbandingan, jumlah ini jauh lebih tinggi daripada anggaran untuk menteri di Amerika Syarikat (RM16 juta, untuk 313 juta warga) dan United Kingdom (RM8.54 juta, untuk 63 juta warga).

pula menyifatkan rombakan itu sebagai kegagalan Najib menggugurkan menteri-menteri yang menunjukkan prestasi buruk.

Pemusatan kuasa Jabatan Perdana Menteri

Hakikat kegagalan menteri sedia ini juga boleh dilihat dengan pertambahan jumlah Menteri di Jabatan Perdana Menteri (JPM) yang sedia banyak, iaitu dari pada 8 kepada 10 menteri.

Keadan ini menunjukkan masalah yang lebih membimbangkan - Najib mula memusatkan pentadbiran negara di bawah jabatannya. Barangkali beliau sendiri kecewa dengan kementerian-kementerian yang ada.

Lihat sahaja unit dan agensi di bawah JPM; seperti Unit Pengurusan dan Prestasi Pelaksanaan (Pemandu), Unit Perancang Ekonomi (UPEN), Lembaga Kemajuan Tanah Persekutuan (FELDA), dan Lembaga Kemajuan Tanah Persekutuan (FELDA).

Kenapa tidak diletakkan Felda di bawah Kementerian Kemajuan Luar Bandar dan Wilayah, atau pun Lembaga Kemajuan Tanah Persekutuan (FELDA)? Begitu juga UPEN, yang sepatutnya di bawah Kementerian Kewangan. Apa perlunya PERMATA, sedangkan kita ada Kementerian Pendidikan?

Dan apakah sebenarnya peranan Datuk Paul Low, menjaga hal ehwal integriti dan rasuah atau menjadi pegawai perhubungan awam (PR) kerajaan apabila menerima kritikan rakyat?

Sudahlah prinsip pemisahan kuasa antara kerajaan Persekutuan dan Negeri tidak dihormati, kuasa pada peringkat Persekutuan pula ingin dipusatkan kepada Perdana Menteri. -



Keluhan peniaga bazar Ramadan

TIDAK berapa lama dahulu, seringkali kita mendengar bahawa bulan Ramadan merupakan peluang kepada peniaga kecil di ibu kota menambah pendapatan berikutan kehadiran berganda pengunjung untuk membeli persiapan hari raya.

Malah kerap kali dilaporkan di media arus perdana, sama ada cetak dan elektronik, betapa keuntungan yang diraih dalam masa sebulan berniaga di bazar Ramadhan dapat menyaingi jumlah pendapatan mereka selama setahun.

Dahulu, kita selalu juga mendengar cerita mereka yang sanggup bercuti sebulan, sama ada kakitangan awam maupun swasta, semata-mata ingin berniaga di bazar Ramadhan. Kata mereka: "Berbaloi ambil cuti. Kerja sebulan, ga jinya setahun."

Namun, sejak kebelakanan ini hal sebaliknya berlaku

apabila kebanyakan mereka terpaksa berkira-kira dan membuat pertimbangan kerana 'melabur' untuk berniaga sebulan di bazar Ramadhan nampaknya lebih berisiko berbanding di bulan-bulan selainnya.

Ironinya, ada di kalangan mereka yang mengambil 'cuti rehat' selama sebulan dan hanya bersedia kembali untuk berniaga menjelang Syawal, barangkali bertujuan mengejalkan kemungkinan kerugian atau kehilangan modal pusingan.

Tinjauan The Rocket ke Bazar Ramadhan di Jalan Masjid India dan Jalan Tuanku Abdul Rahman pada minggu pertama Ramadhan cuba menyingskap cerita, keluh kesah sebahagian peniaga yang mempertaruhkan nasib dan mengambil risiko. Kata mereka; "Untung sabut timbul, untung batu tenggelam."



Sewa tapak cecah RM6,000

'ORANG TENGAH' atau digelar kebanyakan peniaga sebagai 'ejen' Dewan Bandaraya Kuala Lumpur (DBKL) 'menjual tapak' kepada peniaga. Modus operandi mereka ialah memanipulasi hubungan peribadi dengan pegawai DBKL tertentu dan 'membeli' tapak bazar Ramadhan bagi lokasi-lokasi strategik lebih awal.

Menurut Alif Arbani, 30 tahun, tapak bazar Ramadhan itu kemudiannya 'dijual' semula kepada peniaga dengan harga mencecah sepuluh kali ganda. Masalah kakitangan awam tidak amanah dan mengam-

bil kesempatan seperti ini tidak pernah selesai.

"Kalau terus mohon dari DBKL, sewa satu tapak bazar Ramadhan cuma RM500 ke RM600 sahaja. Tapi ada yang terlambat memohon dan masih hendak berniaga," kata Alif yang bekerja di gerai pakaian menjual 'kurta' - pakaian tradisional Pakistan yang kini menjadi fesyen hari raya kaum lelaki di Malaysia.

"Ada yang terpaksa 'beli' tapak dari ejen. Harga satu tapak boleh mencecah sehingga RM6,000.

"Harga ini pun boleh dianggap murah. Tapi tak ada pilihan sebab



semua orang berebut tapak," tambahnya, sambil turut memberitahu bahawa harga tapak akan meningkat sekiranya ada penawaran lebih tinggi daripada pihak lain.

Kuih, biskut raya naik harga 10%



Ahmad Mustaqim, 24 tahun, yang kali ketiga berniaga di bazar Ramadhan Jalan Tuanku Abdul Rahman memberitahu bahawa beliau tidak ada pilihan selain menaikkan harga biskut raya sebanyak 10% bagi menampung kos yang tidak dapat dielakkan.

Ia berpunca daripada kenaikan harga minyak petrol yang, selain kos pengangkutan, memberi kesan langsung kepada persediaan bahan bakar seperti mentega, gula proses, tepung dan kekacang.

"Bila harga minyak petrol naik, kita tak ada pilihan selain terpaksa menaikkan harga jualan. Satu talam biskut raya berharga RM20, naik RM2 berbanding RM18 tahun lalu," kata Mustaqim.

Tambahnya, ada peniaga lain

mun risikonya menjajaskan kualiti produk yang dihasilkan.

"Cara kami berbeza. Walau pun harganya naik sedikit, tapi kualiti tetap sama. Harap-harap pembeli tak merungut.

"Di kedai-kedai lain pun begini. Kalau harga murah, kuantitinya sedikit. Kalau harga meningkat, kualitinya kekal macam dulu. Tapi tetap tak boleh elak sebab harga barang mentah dan petrol meningkat," kata Mustaqim.

yang menggunakan strategi mengurangkan kuantiti demi mengekalkan harganya agar sama seperti tahun lalu. Na-

"Bila harga minyak petrol naik, kita tak ada pilihan selain terpaksa menaikkan harga jualan. Satu talam biskut raya berharga RM20, naik RM2 berbanding RM18 tahun lalu."

Dikenakan caj tambahan

Rata-rata peniaga di kedua-dua Bazar Ramadhan Jalan Tuanku Abdul Rahman dan Jalan Masjid India kecewa dengan pihak pengurusan yang mengekalkan caj tambahan saat akhir yang perlu dibayar secara harian.

Menurut Mohammad Ariffullah, 24, peniaga makanan ringan dan minuman, beliau terpaksa membayar caj tambahan RM3 bagi setiap lampu dan RM5 bagi kipas yang dipasang di tapak jalannya.

"Sekurang-kurangnya kena bayar RM20 setiap hari – bermakna RM600 sebulan. Ini kerana kami terpaksa guna kipas sebab cuaca siang dalam bulan Ramadhan kali ini agak panas," kata Ariffullah yang berasal dari AU3, Kera-mat.

Tambahnya, beliau terpaksa berniaga sehingga jam 12 malam untuk memastikan modal pusingannya dikembalikan selain sedikit untung untuk membayar gaji pekerja dan upah untuk dirinya sendiri.

"Untuk dapatkan modal dan sedikit untung memang kena buka gerai hing-



ga malam. Jadi, bila berniaga sampai tengah malam kami tak ada pilihan, memang kena pasang lampu," katanya

Dalam pada itu, kata Ariffullah, peletakan pondok jualan makanan dan minuman yang tidak sistematis, bersebelahan antara penjual pakaian dan makanan membuatkan para peniaga bermasam muka sesama mereka.

"Tapak niaga tak tersusun. Kami berniaga makanan, jadi bila mengoreng atau memasak, asap akan masuk ke kedai-kedai pakaian. Nak buat macam mana. Selepas undian tapak, kami diletakkan disini. Tak ada pilihan," katanya.

TEROWONG JALAN IMBI RUNTUH

PADA 2 Julai lalu, terowong bawah tanah sepanjang 35 meter di simpang empat Jalan Imbi runtuh dengan kesan tanah jerlus sepanjang hampir 19 meter, dipercayai akibat paip air bawah tanah Syarikat Bekalan Air Selangor (SYABAS) yang pecah.

Insiden yang berlaku kira-kira jam 10.30 pagi itu berpunca daripada sebahagian struktur terowong bawah tanah seliaan Dewan Bandaraya Kuala Lumpur (DBKL) tenggelam lima meter setelah berlaku mendapan tanah.

Kejadian ini menjadi topik perbualan hangat di media sosial, selain mengundang kebimbangan terutamanya kepada pengguna kenderaan awam yang menggunakan perkhidmatan monorel.

Mengulas kejadian itu, Setiausaha DAP Kuala Lumpur Lim Lip Eng membangkitkan persoalan status keselamatan bangunan berhampiran runtuh.

"Ramai yang bertanya, ada-

kah bangunan seperti Plaza Imbi dan Times Square selamat untuk dikunjungi?

"Jadi, perlu ada notis bagi memaklumkan tahap keselamatan dan tindakan susulan untuk orang ramai bagi menjelaskan keadaan sebenar," kata Lim kepada The Rocket.

Terowong yang masih dalam pembinaan itu mempunyai empat laluan kenderaan bagi menurunkan kesesakan di simpang empat Jalan Imbi, dengan menghubungkan laluan kenderaan dari Jalan Pudu menghala ke Jalan Tun Hussein.

Lim yang juga Ahli Parlimen Segambut menggesa pihak berkuasa memastikan kontraktor binaan mengutamakan keselamatan terutama melibatkan orang awam.

"Pihak berwajib seperti DBKL perlu mengetatkan piawaian agar kontraktor sentiasa memastikan tapak projek mereka selamat. Insiden seperti ini boleh membahayakan keselamatan orang ramai," katanya.



KL bandaraya retak dan berlubang

SABAN hari pengguna jalanraya dan pemilik kenderaan di Kuala Lumpur berdepan masalah prasarana yang tidak bermutu. Jalan mendap, berlubang, tampalan tidak sempurna, berpasir, retak dan seribu satu macam masalah yang mengancam keselamatan.

Laporan kerosakan dan aduan kemalan-

gan seolah-olah menjadi rutin, malah warga kota telah mangli dengan keadaan tersebut. Apakah pihak berkuasa negara ini menunggu insiden yang memakan korban besar untuk mewajarkan tindakan segera?

Kita masih tidak lupa isu keretakan struktur tiang jejambat di Jalan Lingkaran Tengah 2

(MRR2), Kepong sebanyak tiga kali iaitu pada tahun 2004, 2006 dan 2008.

Sebahagian daripada kita mungkin tidak tahu bahawa kerja pembaikannya yang hanya siap sepenuhnya pada 2013 itu telah menelan belanja berjumlah RM102 juta berbanding kos pembinaan keseluruhan yang berjumlah

RM238 juta.

Ketika Malaysia ghairah kononnya mahu menuju negara maju, ada perkara asas yang masih belum diselesaikan, iaitu kawalan mutu dan penyenggaraan ke atas pelaksanaan projek yang melibatkan kepentingan awam.



Beberapa kejadian jalan mendap, tanah runtuh dan kerosakan prasarana yang pernah berlaku di ibu negara:

- **5 Nov 2012 :** 150 penghuni Blok F1 kuarters Ibu Pejabat Polis Daerah (IPD) Gombak dipindahkan akibat tanah runtuh.
- **30 Okrt 2012:** Jambatan dekat Putra Perdana, Puchong runtuh menyebabkan laluan ke Puchong, Putrajaya dan Cyberjaya terputus.
- **28 Dis 2012 :** Benteng konkrit di Bukit Setiawangsa runtuh. Penghuni 20 buah rumah dipindahkan.
- **1 Mac 2013 :** Jejambat dekat Putrajaya Link, Selangor Science Park 2 Interchange, Cyberjaya runtuh.
- **8 Mei 2013 :** Sembilan kereta tertimbas dalam tanah runtuh di Jalan Ampang dekat Stesen LRT Dang Wangi.
- **8 Jan 2014 :** Tanah runtuh dengan seluas 10x10 meter persegi di Jalan Mahameru ke Pusat Dagangan Dunia Putra (PWTC).
- **2 Julai 2014 :** Struktur terowong bawah tanah sepanjang 35 meter di Jalan Imbi tenggelam lima meter setelah berlaku mendapan tanah, dipercayai berpunca paip air bawah tanah.